

# AMAWULIRO AMASA NG' OYOKAANA OWEYAGAWANDIIKIRE **Enyanjula**

Ekitabo *AMawuliro aMasa ng'oYokaana oweyagawandiikire*, kimo oku bitabo ebina ebiri omu Ndagaano eMpyaka ebisonzola oku bwomi bwa Yesu Kurisito. Buli kitabo ekimo kwebyo bakyeta bati, “Mawuliro ag’aMazima,” amakulu gaakyo “mawuliro amasa.” AMawuliro aMasa ago bagawandiikire ng'oYesu amalire okufa, era abagawandiikire babbaire Matayo, n'oMaako, n'oLuuka, n'oYokaana.

Omutume oYokaana, eyabbaire omoiza oku beegi ba Yesu niiye eyakiwandiikire, era yakiwandiikire nga wabitirowo emyanka ooti-so 90 okuzwera nakimo oku kubyala oYesu Kurisito. Newankubbaire ng'ekitabo tikikoba kiti oYokaana niiye eyakiwandiikire, iyo empandiika efaananira nakimo n'ebbaluwa eya Yokaana esooka, n'eyokubiri, n'eyokusatu. Abawandiiki abamo ab'eira babbutula bati oYokaana omu kiseera ekyo yabbaire mu kibuga Efeeso, kale kyezyeka okubba ng'ekitabo kinu bakiwandiikiire mwEfeeso.

OYokaana alaga kusani ekigendererwa ky'ekitabo kinu ati kubbeera bantu kwikirirya bati oYesu niiye oKurisito ogubasukireku amafuta. Era ati niiye oMwana wa Kibumba agabira abantu abamwikirirya, obwomi obutawaawo (20:31).

Ekitabo kinu bakiwandiikiire bantu bonabona aBayudaaya n'aBatali Bayudaaya. Omu ngeri egimo, kyawukana ino oku bitabo bidi ebisatu eby'aMawuliro aMasa. Mu kinu ikyo amaani agateeka ku byamagero oYesu ebiyakolere okukiraku engero. Ebintu ebindi ebikulu ng'okubatiza oYesu, n'okumukema omwidungu byona oYokaana tiyabiwandiikireku.

### **Engeri egibyecaanamu**

1. Enyanjula (1:1-18)
2. Ebyamagero ebya buli ngeri oYesu ebiyakolere (1:19-12:50)
3. Ebyafaayo bya Yesu okutuukira nakimo oku kufaakwe n'okuzuukirakwe (13:1-20:31)
4. Ogumo oku mirundi oYesu egiyabonekeire abantu ng'amalire okuzuukira, era n'ekigendererwa ky'ekitabo kinu (21:1-25)

### *ONanzwa w'obwomi*

<sup>1</sup> Omu ntandiika nga bakaali okubbumba ekintu kyonakyona, iye ogubeeta oKibono yabairewo. Iye oyo yabaire aamo n'oKibumba era oKibono nago ali n'obwa Kibumba obwizulye.

<sup>2</sup> Era iye nago yabaire aamo n'oKibumba okuzwera nakimo omu ntandiika.

<sup>3</sup> OKibumba yakoleserye niiye okubbumba ebintu byonabyona. Era anambula iye mpaawo kintu kadi kimo oKibumba ekiyabbumbire.

<sup>4</sup> Iye oKibono nago niiye onanzwa w'obwomi, era iye kitangaala ekimolekera abantu okumanya oKibumba ekyali era ekyataka bakole.

<sup>5</sup> Era oKibono nago kitangaala ekyo ekimolekera abantu abataikirirya, neye ibo abantu abo tibamutegeire.\*

<sup>6</sup> Awo, ni wabbaawo omuntu, iye oKibumba oguyatumire, eriinalye bati Yokaana.

<sup>7</sup> Iye yaizire okukakasa abantu amazima agakwata oku kitangaala nago, kaisi olwo abantu bonabona baikiririrye mu yooyo.

<sup>8</sup> Iye oYokaana tiniye eyabbaire ekitangaala, wazira yaizire akobere abantu ebikwata kwoyo iye ekitangaala nago.

<sup>9</sup> Iye oyo eyabbaire ali kwiza oku kyalo niye ekitangaala ekituuce ekimolekera buli muntu.

<sup>10</sup> Iye oyo oKibono yabbaire oku kyalo era oKibumba yabbumbire ekyalo ng'akolesya niye. Neye oKibono oweyabbaire oku kyalo, abantu ibo tibamutegeire.

<sup>11</sup> Kale iye yaizire oku kyalokye, neye ibo abantube abananyerenyeere tibamwanirizire.

<sup>12</sup> Neye abo bonabona abamwanirizire ni bamwikiririryamu, yabayezyesyerye okusuuka baana ba Kibumba.

<sup>13</sup> Cooka tibasuukire baana ba Kibumba mukubabyala mubutonde, mukuzwa mu lulyo lwa bazeiza baabwe, ooba mukusalawo kwa buntu waire mu kutaka kwa musaiza omufumbo, wazira oKibumba onyere niye oite-waabwe.

<sup>14</sup> Kale oKibono oyo yasuuukire muntu, era yena n'abba oku kyalo ooti niiswe. Twamuboine omu kitiisyakye, ikyo kidi eky'oyo era iye yenkani

---

\* **1:5 1:5** Ooba, *Tibamukaisirye okwaka okulaga ekyo oKibumba ekyali.* **1:6 1:6** Mat 3:1; Mak 1:4; Luk 3:1-2

eyazwire egiri oKibbumba oTeeye, nga iye oKibono aizwire ekisa n'amazima agakwata oku Kibbumba.

<sup>15</sup> Cooka oYokaana yalangiriire ati, "Onu niiye ogunatumwireku owenakobere nti, 'Oyo eyaliza oluzwanyuma lwange, ankiraku ekitiisya, olw'okubba yansookere okubbaawo.' "

<sup>16</sup> Era okusinzirira oku bwizulye bw'ekisaakye, swenaswena twabire nga tusuna ebirabo eby'okumo kumo.

<sup>17</sup> Ekyo kityo olw'okubba oKibbumba yawaire Musa aMateeka okugatuleetera, kaisi ekisa n'amazima agakwata oku Kibbumba ibyo twabisunire kubita mu Yesu Kurisito.

<sup>18</sup> Era mpaawo abonangaku oKibbumba, oku-toolaku oMwanawe omoiza yenkani oYesu, iye oyo aali aamo n'oKibbumba omu kitiisyaakye, era oMwanawe oyo nago niiye eyatumanyikisirye oKibbumba ekyali.

*Obukwenda bwa Yokaana oMubatizi  
(Mat 3:1-12; Mak 1:1-8; Luk 3:1-18)*

<sup>19</sup> Kale awo abeekubbemberi b'aBayudaaya ab'omu kibuga ky'e Yerusaalemi ni batuma abamo oku bakabona n'aBaleevi okubuulya oYokaana oMubatizi bati, "Niiwe onaani?"

<sup>20</sup> Iye tiyeebisabisire, wazira yabbutwire n'eidembe ati, "Tininze oKurisito ogubasukireku amafuta."

<sup>21</sup> Awo niiwo ibo okumubuulya bati, "Aale atyanu niiwe onaani? Niiwe Eriya?"

Iye oYokaana n'abairamu ati, "Bbe tininze Eriya."

Tete ni bamubuulya bati, “Niiwe onaabbi oodi ogubatusuubizire?”

Iye n’abairamu ati, “Bbe.”

<sup>22</sup> Awo ekisembayo tete ni bamubuulya bati, “Abatutumire twabakoba tuti niiwe onaani? Weeyeta otya?”

<sup>23</sup> Kale awo oYokaana n’abairamu ng’ajulira Kiwandiike ekiri omwIsaaya ekiti, “Ninze oyo atumulira omwidungu n’eigono eryaminkirira nti, ‘Mutereerye oluguudo lwa Musengwa oYesu.’”

<sup>24</sup> Awo olwo aBafalisaayo abo abebatumire

<sup>25</sup> niiwo okubuulya oYokaana bati, “Kale lwaki obatiza obanga tiniwe oKurisito ogubasukireku amafuta, era nga tiniwe Eriya waire onaabbi oodi ogubatusuubizire?”

<sup>26</sup> Era oYokaana n’abairamu ati, “Nze mbatiza n’amaizi, neye waliwo iye abeemereiremu aanu ogumutategeera.

<sup>27</sup> Niiye oyo eyaliiza oluzwanyuma lwange, nze oguntasaanira okusibindula obusibiro bw’engaitogye.”

<sup>28</sup> Ebyo byonabyona byabbairawo mu Bbesaniya, oku lubba ludi olundi olwa mwiga oYoludaani eeyo oYokaana egiyabaire abatizira.

### *Iye atoolawo ekibbikibbi*

<sup>29</sup> Awo oku lunaku olwairireku, oYokaana n’abona oYesu ng’asimba e gyalu, kaisi oYokaana n’akoba ati, “Aale mubone oyo aali ooti Ntaama oMutomuto owa Kibbumba, iye oYesu, oKibbumba oguyalondere okuwaayo ng’esadaaka okutoolawo ebikole ebibbibbi eby’ekyalo.

<sup>30</sup> Niiye oyo ogunatumwireku nti, ‘Waliwo omuntu eyaliiza oluzwanyuma lwange, iye ankiraku obwezye olw’okubba iye yansookere okubona eisana.’

<sup>31</sup> Era nze zena nabbaire timmutegeire nti niiye, neye ekyagirire ni njaba ng’ambatiza n’amaizi, kyabbaire nti, Iye amanyikane ati niiye omulonde omu bantu b’e Isirairi.”

<sup>32</sup> Awo oYokaana n’akakasa kusani ino ati, “Naboine oMwoyo oMutukulye ng’amwikaku okuzwa omwigulu, ng’ali ooti njiiwa, era n’amusigalaku.

<sup>33</sup> Nze tinankubbaire mmumanya, neye oK-ibbumba eyantumire okubatiza n’amaizi, niye eyankobere ati, ‘Oguwalibona ng’oMwoyo amwikaku era n’amusigalaku, yalibba niiye oyo eyalibatiza n’oMwoyo oMutukulye.’

<sup>34</sup> Era ikyo nakiboine, era mbakakasa nti oyo niiye oMwana wa Kibbumba.”

### *Abeegi ba Yesu abasookere*

<sup>35</sup> Oku lunaku olwairireku, oYokaana tete yabbaire omu kifo ekinyere kidi ng’ayemereire aamo n’ababiri oku beegibe.

<sup>36</sup> Awo n’abona oYesu ng’abita, oYokaana n’akoba abeegibe ati, “Aale mubone oyo aali ooti Ntaama oMutomuto, iye oYesu, oKibbumba oguyalondere okuwaayo!”

<sup>37</sup> Awo abeegi ba Yokaana ababiri nago owe-bawuliire ng’oYokaana atumula ebibono ebyo, ni basimbuka ni basengererya oYesu.

<sup>38</sup> Kale awo oYesu oweyacuukire okulola e nyuma n’abona ng’abantu abo nago ababiri bamusengererya, n’ababuulya ati, “Munoonia

niki?” Ibo ni bamwiramumu bati, “Laabbi ogona yaina?” (Ekibono “Laabbi,” ky’olutumu oLwebbulaniya, amakulu gati Musomesya).

<sup>39</sup> Awo oYesu n’abairamu ati, “Mwize twabe mumanyiceeyo.” Awo ni baaba ni bamanyica oYesu egyagona. Owebaabiireyo gyabbaire ooti saawa ikumi egyeigulo era basiibire naye olunaku olwo.

<sup>40</sup> Era omoiza kwabo abawuliire oYokaana ng’atumula oku Yesu, era nago abasengereirye oYesu, yabbaire Andereya, omuganda wa Simooni oPeetero.

<sup>41</sup> Era iye Andereya ekintu ekiyasookere okukola kwabbaire kunoonia mugandawe oSimooni n’amukoba ati, “Tuboine oMasiya.” Amakulu gati oKurisito ogubasukireku amafuta.

<sup>42</sup> Era awo Andereya n’atwala oSimooni egiri oYesu. Cooka oYesu n’alingirira oSimooni kaisi n’amukoba ati, “Niiwe oSimooni omutaane wa Yokaana. Era bakwetanga bati Keefa,<sup>†</sup> nga litegeeza Peetero.

### *OYesu akoba oFiripo n’oNasanairi okumusengererya*

<sup>43</sup> Oku lunaku olwairireku, oYesu n’asalawo okusimbuka okwaba omwitwale ly’e Galiraaya. Kale eeyo n’ayajiriryayo oFiripo, era oYesu n’amukoba ati, “Oize obbe mwegi wange.”

<sup>44</sup> OFiripo yena yabbaire azwera mu kibuga ky’e Bbesusaida, Andereya n’oPeetero egibabbaire bazwera.

---

**1:40 1:40** Yok 1:37 † **1:42 1:42** *Keefa*, Liri mu Lwebbulaniya, omu Luyonaani bati, *Peetero, Nga gategeeza Ibaale.*

<sup>45</sup> Kale oFiripo n'anoonia oNasanairi era n'amubona, kaisi n'amukoba ati, "Tuboine omuntu oodi oMusa oguyatumwireku omu Kitabo ky'aMateeka, era n'abanaabbi bona ogubatumwireku omu Biwandiike. Era oyo nago niiye oYesu omutaane wa Yusufu ow'omu kibuga ky'e Naazaleesi."

<sup>46</sup> Awo oNasanairi n'amubuulya ati, "Naazaleesi! Eeyo yona eyezya okuzwakuuyo akasa konakona?" OFiripo n'amwiramumu ati, "Ala oize obone."

<sup>47</sup> Iye oYesu oweyaboine oNasanairi nga yatira okumutuukaku, oYesu n'amutumulaku ati, "Obone oMwisirairi onanyerenyeere, onambulamu bubbeyi naire."

<sup>48</sup> Awo iye oNasanairi n'amubuulya ati, "Omanyiciryeye otya?" OYesu n'amwiramumu ati, "Nkuboine ng'okaali oli mu musaale omutiini, nga n'oFiripo akaali n'okukweta."

<sup>49</sup> Kale awo oNasanairi n'akoba ati, "Musesesya, niwe oMwana wa Kibbumba, era niwe oKabaka wa Isirairi!"

<sup>50</sup> Iye oYesu n'amukoba ati, "Oikirirya olw'okubba nkukobere nti nkuboine ng'okaali oli mu musaale omutiini? Walibona n'ebikiraku ebyo."

<sup>51</sup> Era oYesu n'ayongeraku okumukoba ati, "Mazima dala mbakobera nti mwalibona eigulu nga lyeigwire, n'abamalaika ba Kibbumba nga baniina omwigulu era nga baika oku Mwana wa Muntu."



## 2

### *Embaga y'obugole e Kaana*

<sup>1</sup> Awo oluzwanyuma lw'enaku ibiri, oku lwokusatu, ni wabbaawo embaga ey'obugole omu kibuga e Kaana eky'omwitwale ly'e Gali-raaya. Omaaye wa Yesu yabbaireyo oku mbaga eyo,

<sup>2</sup> era oYesu n'abeegibe bona babbaire beete oku mbaga nago, era bona babbaireyo.

<sup>3</sup> Kale awo enviinyo owegyawoirewo, omaaye wa Yesu n'amukoba ati, "Tibakaali bali n'enviinyo."

<sup>4</sup> Neye oYesu n'amukoba ati, "Mama, lwaki onnyingirya omu bintu ebyo? Nze ekiseera ekyange kikaali kutuuka."

<sup>5</sup> Neye omaaye n'akoba abaweererya b'okumbaga ati, "Buli ekiyabakoba nga inywe mukikola."

<sup>6</sup> Kale oku mbaga aawo wabbairewo agansaka aganene mukaaga agebabaizire omu mabbaale. Agansaka ago nago babbaire bagateekerewo lw'omukolo ogw'aBayudaaya ogw'okwetukulya, buli gunsaka ogumo nga gw'elita 80 ku 120.

<sup>7</sup> Oluzwanyuma oYesu n'akoba abaweererya abo nago ati, "Agansaka ago mugaizulye amaizi;" era bona ni bagaizulirya nakimo paka ku migo.

<sup>8</sup> Awo n'abakoba ati, "Aale atyanu museneku mutwalire oyo akulira embaga."

Kale abaweererya bona ni bakola ekyo oYesu ekiyabakobere,

<sup>9</sup> era akulira embaga n'alegaku amaizi oYesu ageyabbaire asuuciryemu enviinyo. Cooka tiyamanycirye egiyabbaire ezwire

waire ng'abaweererya abasenere amaizi ago ibo babbaire bamaite. Kale awo akulira embaga n'airya omugole omusaiza oku mbale okumukoba ati,

<sup>10</sup> "Buli muntu asooka kugabula nviinyo ensa, atyanu abageni owebamala okunywa ni banoja, kaisi n'aleeta etali nsa. Neye iwe obisire enviinyo ensa paka saawa eenu."

<sup>11</sup> Kanu niiko akamanyiciryo k'ekywunyo akasooka oYesu akeyakolere omu kibuga e Kaana eky'omwitwale ly'e Galiraaya, era omu ngeri eyo yalagire ekitiisyakye, era abeegibe ni bongera okumwikiririryamu.

<sup>12</sup> Ekiseera owekyabitirewo ng'embaga ewoire, oYesu n'abagandabe n'abeegibe, era n'omaaye, ni baserengeta ni baaba omu kibuga e Kaperenawumu eeyo egibamalire enaku ntono giti.

*OYesu abbinga abatundira omu Yeekaalu  
(Mat 21:12-13; Mak 11:15-17; Luk 19:45-46)*

<sup>13</sup> Awo oMukolo ogw'aBayudaaya ogw'oKutambukirya owegwabbaire gwatira okutuuka, oYesu n'abeegibe ni baniinaniina ni baaba omu kibuga e Yerusaalemi.

<sup>14</sup> Cooka omu luuga lw'eYeekaalu yaajiiriryemu abantu nga batundiramumu ente n'entaama n'enjiwa egy'okusadaaka, era n'abandi nga batyaime bawaanyisya empiiya.

<sup>15</sup> Kale awo oYesu n'akwata emiguwa, n'agikambamu ofaalu, era awo n'abbingamu bonabona bazwe omu luuga lw'eYeekaalu,

era n'abbingamu n'entaama n'ente. Era n'agangulyaga amamenza agebabbaire bawaanyisiryaku empiiya, era empiiya ni gisusukiaga.

<sup>16</sup> Awo n'akoba ababbaire batundiramu enji-iwa ati, "Enjiiwa ginu mugitoole aanu. Mubba mutya okusuuca enyumba ya Bbaabba okubba katale!"

<sup>17</sup> Awo abeegi ba Yesu ni beebukirya bati bakiwandiikire bati, "Okutaka eino enyumbayo, Musengwa Kibbumba, kwalimmalisyawo."

<sup>18</sup> Kale awo abeekubbemberi b'aBayudaaya ababbairewo ni bamukoba bati, "Kamanyiciryo k'ekywunyoki akooyezya okukola okutulaga oti oli n'obwezye okukola ebyo byonabyona?"

<sup>19</sup> Iye oYesu n'abairamu ati, "Aale muvunewo eYeekaalu eenu, nze nagyombeka omu naku isatu."

<sup>20</sup> Awo abeekubbemberi b'aBayudaaya ni bakoba bati, "Tumalire emyanka 46 nga twombeka eYeekaalu eyo, kaisi iwe wagyombeka otya omu naku eisatu?"

<sup>21</sup> Neye eYeekaalu oYesu egiyabbaire atumulaku, niigwo omubirigwe.

<sup>22</sup> Era oweyamalire okuzuukira, kaisi abeegibe ni beebukirya bati yakitumwire, ni baikirirya eBiwandiike, era n'ebibono oYesu ebiyabbaire atumwire.

*OYesu amaite emyoyo gy'abantu bonabona*

<sup>23</sup> Awo oYesu oweyabbaire ng'akaali ali e Yerusalemi oku Mukolo ogw'oKutambukirya,

abantu bangi ni babona obumanyiciryo obw'ebyewunyo oYesu obuyakolere ni bamwikiririyamu.

<sup>24</sup> Neye oYesu iye tiyabeesigire, olw'okubba yabbaire amaite emyoyo gy'abantu bonabona.

<sup>25</sup> Yabbaire tiyeetaagisya muntu niiye n'abba amukobera ebintu omuntu ebyaseega, olw'okubba iye onyere yabbaire amaite ebiri omu mwoyo gwa buli muntu.

### 3

#### *OYesu n'oNikodemu*

<sup>1</sup> Wabbairewo omusaiza, eriinalye bati Nikodemu, era yabbaire mukwenda oku lukiiko lw'aBayudaaya olukulu. Omusaiza oyo yabbaire w'omu kibbula kya Bafalisaayo.

<sup>2</sup> Kale omusaiza oyo n'ayaba obwire egiri oYesu, era n'amukoba ati, "Musomesya, iswe tumaite tuti oli musomesya oKibbumba oguyatumire. Ekyo kityo olw'okubba mpaawo ayezya okukola obumanyiciryo obw'ebyewunyo iwe owookola, okutoolaku ng'oKibbumba ali naye."

<sup>3</sup> Iye oYesu n'amwiramumu ati, "Mbakobera amazima nti omuntu owebatamubyala omulundi gwokubiri, tiwakwingira omu bwakabaka bwa Kibbumba."

<sup>4</sup> Awo oNikodemu n'amubuulya ati, "Omuntu akulire bayezya batya okwiramumu okumubyala tete? Mazima tayezya okukanga omu kida kya maaye, kaisi tete ni bamubyala omulundi ogwokubiri."

<sup>5</sup> Iye oYesu n'amwiramumu ati, "Nkukobera amazima nti omuntu owebatamubatiza n'amaizi era n'asuna n'oMwoyo oMutukulye, tiwakwingira omu bwakabaka bwa Kibbumba.

<sup>6</sup> Iye omuntu abyala muntu, era n'omuntu asuna oMwoyo oMutukulye asuka muyaaka omu bwomibwe obw'omwoyo.

<sup>7</sup> Tiweewunya olw'okubba nkukobeire nti omuntu bateekwa okumubyala omulundi ogwokubiri.

<sup>8</sup> Iye ompunga owaafuwa, egyataka gyalungama. Cooka owulira kuwuma kwonkani, neye tomanyica egyazwa n'egyayaba. Kale n'omu ngeri enanyere eyo tikyezyeka okukimanya engeri omuntu egibamubyala omu bwomibwe obwa mwoyo."

<sup>9</sup> Awo oNikodemu n'amubuulya ati, "Ebyo byezya bitya okubbaawo?"

<sup>10</sup> OYesu n'amwiramumu ati, "Iwe omukugu omu by'ediini aanu omwIsirairi, obba otya okubba nga totegeera ebintu ebyo?"

<sup>11</sup> Nkukobera amazima nti iswe tutumula ku bintu ebitumaite, era tubakobera ku bintu ebitwaboineku, neye era inywe timwikirirya ebitubakobera.

<sup>12</sup> Kaisi obanga owembakobeire ebintu ebibakola oku kyalo timwikiriirye, kaisi leero owenabakobera ebibakola omwigulu mwabiikirirya mutya?

<sup>13</sup> Mpaawo kwinywe eyabbaire aniinireku omwigulu, wazira iye oMwana wa Muntu oyo iye eyazwereireyo."

14 Era ng’oMusa oweyaanikire ekibbumbwe kya mpiri oku kisaale omwidungu, n’omu ngeri enanyere eyo n’oMwana wa Muntu atyo webateekwa okumwanika oku musalabba,

15 kaisi kyezye okubba nti buli muntu amwikiririyamu asune obwomi obutawaawo.

16 Ekyo kityo olw’okubba oKibbumba yatakire ino abantu era n’awaayo oMwanawe omoiza yenkani, kaisi nabuli muntu amwikiririyamu tiyajigirika, wazira abbe n’obwomi obutawaawo.

17 Ekyo kityo olw’okubba oKibbumba tiyatumire oMwanawe oku kyalo kusalira bantu musango, wazira yamutumire, kaisi abantu balokoke nga babita mu niye.

18 Nabuli aikiririrya omu Mwana wa Kibbumba tigumusinga, neye oyo atamwikiririyamu gubba gumalire okumusinga, olw’okubba taikiririrya omu Mwana oyo omoiza yenkani owa Kibbumba.

19 Era gunu niigwo omusango. Iye oyo ekitangaala yaizire omu bantu, neye ibo ni bataka kukolanga bikole ebibbibibi eby’endikiirya okukiraku ebisa eby’ekitangaala.

20 Ekyo kityo olw’okubba buli muntu akola ekikole ekibbikibi, acaawa oyo ekitangaala, era taiza egyali olw’okutya ati bademba ni babonekesya ebikolebye ebitali bisa.

21 Neye buli muntu akolera oku mazima ga Kibbumba, ayaba egyali oodi iye ekitangaala, kaisi olwo kibbe aweeru kusani kiti, ekikole ekyo ekisa ekyabba akolere, asinziriire mu maani ga Kibbumba.

*OYokaana oMubatizi atumula oku Yesu*

<sup>22</sup> Ebyo owebyawoire, oluzwanyuma lw'enaku ntono oYesu n'abeegibe ni baaba omu kitundu eky'e Buyudaaya, n'abba eeyo nabo, era n'abatiza abantu.

<sup>23</sup> Era oYokaana yena yabbaire ng'ali kubatizanga omu mwiga Anoni, okumpi n'ekibuga e Saalimu olw'okubba eeyo amaizi gabbaireyo mangi, era n'abantu ni beeyongeranga okwabayo okubabatiza.

<sup>24</sup> Ebyo byabbairewo ng'oKerode akaali okwigo galira oYokaana omu mabbusu.

<sup>25</sup> Atyanu, abamo oku beegi ba Yokaana ni babba n'enkayaana n'abamo oku Bayudaaya, oku bikwata oku bulombolombo obw'okwetukulya.

<sup>26</sup> Kale awo ni baaba eeri oYokaana ni bamukoba bati, "Musomesya, oyebukirya omusaiza oodi oguwabbaire naye era oguwatuwaireku obujulizi owewabbaire ng'oli kubatiza abantu oku lubba ludi olwa mwiga oYoludaani? Omusaiza oyo aali kubatizanga, era abantu abakira obungi baaba giri niiye."

<sup>27</sup> Awo oYokaana n'abairamu ati, "Omuntu tayezya okusuna obwezye bwonabwona ng'oKibbumba tiniye amuwaire.

<sup>28</sup> Inywe abananyere mwezya okuwa obukakafu muti nakobere nti, 'Tininze oKurisito ogubasukireku amafuta, neye nze oKibbumba yantumire kukobera bantu ebikwata kwoyo ng'akaali okwiza.'

<sup>29</sup> Kityo n’omugole abba w’oyo amuleetere. Era omukaagwa w’oyo aleetere omugole iye abbaawo kubbeera oyo aleetere, amubba kumpi n’amuwulisisya, era asangaala ino owaawulira eigono ly’oyo aleetere omugole. Era n’omu ngeri enanyere eyo zena eisangaalo lyange libba mu bwizulye owempulira nti abantu baaba egiri oYesu.

<sup>30</sup> N’olwekyo iye oYesu atekwa okweyongera okufuma, neenu nga nze niye wenkendeera omu kufuma.”

*Iye oyo akira bonabona*

[  
<sup>31</sup> Awo oYokaana n’ayongera okubakoba ati, “Oyo oMulonde azwa omwigulu niye akira bonabona. Cooka abo ababyale b’oku kyalo kunu babba bantu-buntu, era batumula biibyo ebikwata oku kyalo. Neye oyo azwa omwigulu niye akira bonabona.

<sup>32</sup> Era iye nago akobera abantu ku biyaboineku n’ebiyawuliireku ng’ali egiri oKibbumba, neye mpaawo aikirirya ati ebyatumula bituuce.

<sup>33</sup> Wazira omuntu aikirirya ekibonokye, abba bukakafu obulaga buti oKibbumba ekyakoba kituuce.

<sup>34</sup> Ekyo kityo olw’okubba oodi nago oKibbumba oguyatumire, atumula bibono ebyo ebyasuna okuzwa eeri oKibbumba olw’okubba oKibbumba amuwa oMwoyowe omu bwizulye.

<sup>35</sup> OKibbumba era olteeye ataka oMwanawe, era yawaire oMwanawe obwezye oku bintu byonabyona.



<sup>36</sup> Kale buli muntu aikiririrya omu Mwana wa Kibbumba, abba n'obwomi obutawaawo. Neye atamwikiririryamu, tabba nabwo, wazira oKibbumba yeeyongera kusunguwala olwa muntu oyo].”\*

## 4

### *OYesu atumula n'omukali oMusamaaliya*

<sup>1</sup> Omu kiseera ekyo aBafalisaayo bawuliire bati oYesu ali kusunanga era ng'ali kubatizanga abasengereri bangi okukiraku oYokaana.

<sup>2</sup> Waire nga babbaire bakiwuliire batyo, ekituuce kiri nti oYesu iye onyere tiniye eyabatizanga, neye abeegibe.

<sup>3</sup> Kale oYesu oMusengwa oweyategeire ebintu ebyo abantu ebibabbaire bamutumulaku, n'azwa omwitwale ery'e Buyudaaya, n'akanga omwitwale ery'e Galiraaya.

<sup>4</sup> Era yabbaire ng'ali n'okubita omwitwale ly'e Samaaliya.

<sup>5</sup> Kale awo n'atuuka omu kibuga eky'omu Samaaliya ekibeeta Sikali, ekiri okumpi n'omuwuluko eira oYaakobbo oguyawaire omutaanewe oYusufu.

<sup>6</sup> Omu muwuluko ogwo mwabbairamu eiruba oYaakobbo eriyabbaire akwire. Cooka oYesu yabbaire adembere olw'olugendo, kale n'atyamaku okwiruba eeryo okuwuumulaku oku saawa ooti mukaaga egy'omusana.

---

\* **3:36 3:31-36** Abakugu omu by'eBbaibbuli bakoba bati ebiri omu nyiriri ginu tibyabbaire bya Yokaana wazira bya bawandiiki. **4:5 4:5** Nta 33:19; Yos 24:32

<sup>7</sup> Awo ni wabbaawo omukali oMusamaaliya eyaabire okwiruba nago okusena amaizi, kaisi oYesu n'amukoba ati, "Ompeeku amaizi nnyweku."

<sup>8</sup> Omu kiseera ekyo abeegi ba Yesu babbaire baabire mu kibuga Sikali kugula kyokulya.

<sup>9</sup> Awo iye omukali oMusamaaliya n'amwiramu ati, "Iwe oli Muyudaaya aate nze ndi mukali Musamaaliya. Oyezya otya okunsaba amaizi okunywa?" Omukali oyo yakobere atyo olw'okubba aBayudaaya babbaire nga tibakolagana n'aBasamaaliya.

<sup>10</sup> Awo oYesu n'amwiramu ati, "Singa obbaire omaite ekirabo oKibbumba ekyataka okukuwa, era singa omaite akusaba amaizi okunywa, wandibbaire omusabire amaizi agaleeta obwomi, era yandigakuwaire."

<sup>11</sup> Tete omukali n'amukoba ati, "Sebo, obula ekiwasenesya, aate eiruba lyabiriri. Watoola yaina amaizi nago ag'obwomi?"

<sup>12</sup> Ekyotegeeza iwe okira ozeiza waiswe oYaakobbo iye eyatuwaire eiruba linu, iye n'abaanabe eryebanywangamu era n'ebayobye?"

<sup>13</sup> Awo oYesu tete n'amwiramu ati, "Buli muntu anywa amaizi ganu, enyonta yaliiramu okumuluma.

<sup>14</sup> Neye buli anywa amaizi gadi ageemuwa, enyonta tiyaliiramu okumuluma emirembe n'emirembe. Era amazima aganyere, amaizi ago agempa omuntu oyo, mwiye galisuuka nsulo eyalimuwa obwomi obutawaawo."

<sup>15</sup> Tete era omukali nago n'amukoba ati, "Sebo, ompeeku amaizi ago nago kaisi enyonta tiyandumanga, era mpezye okutaizanga aanu okwiruba tete okusena amaizi."

<sup>16</sup> Iye awo oYesu n'amukoba ati, "Oyabe oyete oibaawo, oire naye aanu."

<sup>17</sup> Iye omukali n'amwiramumu ati, "Mbula oibange." Awo oYesu n'amukoba ati, "Oli mutuce okukoba oti obula oibaawo."

<sup>18</sup> Dala ekyo ekyokobere kituce olw'okubba wankafumbirwaku abasaiza bataanu, era omusaiza ogwolinaye omu kiseera kinu tiniye oibaawo. Era ekyo ekiwankazwa okutumula kituce."

<sup>19</sup> Awo omukali n'akoba oYesu ati, "Sebo, ombonekera ooti oli naabbi."

<sup>20</sup> Aale obone kinu; iswe aBasamaaliya, abazeiza baiswe basinziranga oKibbumba ku lusozi lunu oGerizimu. Neye inywe aBayudaaya mukoba muti eYeekaalu ey'omu Yerusaalemi niikyo ekifo omututeekwa okusinziranga oKibbumba."

<sup>21</sup> Awo iye oYesu n'amukoba ati, "Mukali iwe, oikirirye ebyenkoba nti ekiseera kiiza, ekimwalibbanga timukaali musinzira oItewaiswe oKibbumba ku lusozi lunu waire mu Yerusaalemi."

<sup>22</sup> Aale inywe aBasamaaliya timumaite oKibbumba ogumusinza. Neye iswe aBayudaaya tumaite oKibbumba ogutusinza, olw'okubba oKibbumba akolesya Bayudaaya okulokola abantu."

<sup>23</sup> Neye era ekiseera kiiza, era kituukire, abantu abasinza omu butuce atyanu ekibasinzirangamu oKibbumba oItewaiswe mu mwoyo era mu butuce. Ekyo kityo olw'okubba ibo

abasinza batyo niibo oItewaiswe oKibbumba abanoonia.

<sup>24</sup> Iye oKibbumba mwoyo mwereere, kale abo abamusinza bateekwa okumusinzanga mu mwoyo era mu mazima.”

<sup>25</sup> Era awo omukali n’amukoba ati, “Mmaite nti oMasiya aiza. Era iye oweyaliiza yalitusonzolera ebintu byonabyona.”

<sup>26</sup> Kale awo oYesu n’amukoba ati, “Nze atumula na iwe ninze oyo nago ogwotumulaku.”

### *Abeegi bakanga egiri oYesu*

<sup>27</sup> Omu kiseera ekinyere ekyo abeegi ba Yesu ni bakanga egiri oYesu, cooka ni beewunya okwajirya oYesu ng’atumula n’omukali. Neye ni watabbaawo kwibo eyabwirye omukali ati, “Otaka niki?” Ooba abuulya oYesu ati, “Lwaki otumula naye?”

<sup>28</sup> Kale awo omukali oyo n’aleka awo ensakaye ey’amaizi, n’akanga omu kibuga e Sikali n’akoba abantu ababbaireyo ati,

<sup>29</sup> “Mwize mubone omusaiza andagwireku byonabyona nenca ebinkolanga. Onu ayezya okubba niye oKurisito ogubasukireku amafuta?”

<sup>30</sup> Awo abantu ni bazwa omu kibuga ekyo nago, ni baweera eeyo okumweboneraku.

<sup>31</sup> Omu kiseera ekyo omukali ekiyakobeiremu abantu, abeegi babbaire mu kwegairira Yesu bati, “Musomesya, obbeeku n’akoolya.”

<sup>32</sup> Neye iye n’abairamu ati, “Nze ndi n’ekyokulya inywe ekimutamaiteku kadi.”

<sup>33</sup> Awo abeegibe ni beebuulyangana bati, “Weezya okubba waliwo amuleeteireku ekyokulya?”

<sup>34</sup> Neye iye oYesu n’akobera abeegibe ati, “Owenkola ebyo eyantumire ebyataka nkole, mba mwikuti ooti-so ndiire kyokulya.

<sup>35</sup> Aale timuli n’entumula ekoba eti, ‘Wasigaireyo emyeri eena, kaisi amakungula gatuuke?’ Neye nze mbakoba nti mulole eedi oku misiri mubone amakungula gatuukire!

<sup>36</sup> “Era n’omu kiseera kinu omukunguli asuna empeeraye, era n’amakungula niibo abantu abebaingirya omu bwomi obutawaawo. Ekyo kityo olw’okuzweramu omusigi n’omukunguli basune eisangaalo ery’aamo.

<sup>37</sup> Era omu ngeri eyo entumula eenu ntuuce ekoba eti, ‘Ogondi asiga, era ogondi n’akungula.’

<sup>38</sup> Aale nabatumire okwaba okukungula ek-inandi muteganira. Ibo bantu bandi niibo abakalabanire n’amaani kaisi niinywe ni mubba musunamu emigaso mwebyo abandi ebibakalabanire.”

### *ABasamaaliya bangi ni baikirirya*

<sup>39</sup> Awo abantu bangi ab’omu kibuga ky’e Samaaliya ekyo, ni baikiririrya omu oYesu olw’ebibono omukali oyo ebiyabakobeire ati, “Andagwireku byonabyona nenca ebinkolanga.”

<sup>40</sup> N’olwekyo abantu b’omu Samaaliya owe-batuukire oYesu egiyabbairira, ni bamwegairira abbeeku eeyo nabo, kale oYesu n’amalayo enaku ibiri.

<sup>41</sup> Era olw'ebibono oYesu ebiyatumwire byazw-ereireku abantu abandi bangi ab'omu Samaaliya okumwikiririryamu.

<sup>42</sup> Era ni bakoba omukali oyo nago bati, "Aale atyanu titwikiririrya omu Yesu lw'ebibonobyoye byotukobeire, neye olw'okubba iswe abanyere twewuliriireku, era atyanu tumaite tuti omusaiza onu dala niye oMulokoli w'abantu b'oku kyalo."

*OYesu alamyanya omwana w'omukungu*

<sup>43</sup> Oluzwanyuma lw'enaku eibiri, oYesu n'azwa omu kibuga e Sikali, n'akanga omwitwale ery'e Galiraaya.

<sup>44</sup> Cooka oYesu onyere yabbaire akitumwireku ati, "Onaabbi tibamuwa ekitiisya omu kyalo ky'e waabwe."

<sup>45</sup> Wazira oweyatuukire e Galiraaya, abantu baayo ni bamusangaalira. Ibo bakolere batyo olw'okubba bona babbaire baboineku byonabyona ebiyabbaire akolere e Yerusaalemi, oku Mukolo ogw'oKutambukirya, olw'okubba bona babbaireyo oku Mukolo ogwo.

<sup>46</sup> Awo oYesu n'akanga omu kibuga e Kaana eky'omwitwale ery'e Galiraaya, enyumaku egiyasuuciirye amaizi ni gabba nviinyo. Cooka eeyo wabbaireyo omukungu wa kabaka eyabbaire omutyami w'omu kibuga ky'e Kaperenawumu eyabbaire n'omutaanewe omulwaire.

<sup>47</sup> Omusaiza oyo oweyawuliire ati oYesu azwire omwitwale ly'e Buyudaaya atuukire omu Galiraaya, n'ayaba egiyabbaire n'amwegairira aserengeteku e Kaperenawumu, alamy'e omutaanewe eyabbaire yatira okufa.

<sup>48</sup> Awo oYesu n'amukoba ati, "Owemutabone nga nkola obumanyiciryo obw'ebiyewunyo era n'ebiyewunyisya timwaikirirye."

<sup>49</sup> Neye omukungu n'amwiramu ati, "Sebo, nkwegairiire tuserengeteku e wange ng'omwana wange akaali okufa."

<sup>50</sup> Iye oYesu n'amukoba ati, "Okange e ika, omutaanewo ayaba okulama." Kale omusaiza oyo n'aikirirya ebibono oYesu ebiyamukobere, era n'asimbuka okukanga e ika.

<sup>51</sup> Oweyabbaire ng'ali omu nzira, abagalamabe ni bamusangaana, ni bamukobera bati, "Omutaanewo alamire."

<sup>52</sup> Kaisi iye oweyababwirye esaawa egiyaisuukiiremu, ni bamukoba bati, "Omusuuja gwalamire izo ku saawa musanvu."

<sup>53</sup> Awo oiteeye w'omwana n'ayebukirya ng'eeyo niiyo esaawa enanyerenyeere oYesu egiyamukobereiremu ati, "Omutaanewo ayaba okulama." Awo omusaiza oyo aamo n'ab'omu kisitokye bonabona, ni baikiririrya omu Yesu.

<sup>54</sup> Era ako niiko akamanyiciryo k'ekyewunyo akokubiri oYesu ekiyakolere oweyazwire e Buyudaaya n'akanga e Galiraaya.

## 5

*OYesu alamy'a omulwaire oku kidiba*

1 Awo ekiseera owekyabitirekuuwo, oYesu n'aniinaniina e Yerusaalemi oku mukolo gw'aBayudaaya.

2 Omu Yerusaalemi, okumpi n'ogumo oku miryango egyaingirangamu ogubeeta oMulyango gw'entaama,\* wabbairewo ekidiba ky'amaizi. Ekidiba ekyo nago omu Lwebbulaniya ekibeeta Bbetizata,† kyabbaireku ebisiisira bitaanu nga bikyeruguulirirye.

3 Omu bisiisira ebyo, mwalambaalangamu abalwaire bangi ino, n'aboofu, n'abaleme, n'abasanyalaire era [ni bakuumiriranga amaizi okwekuyugamu.

4 Omalaika yaikanga omu kidiba omu biseera ebimo, n'akuyugamu amaizi. Oyo eyesookanga okwika omu kidiba nga bamalire okukuyugamu amaizi, yalamanga buli bulwaire bwonabwona obuyaabbanga nabwo.]‡

5 Kale awo oku kidiba wabbairewo omusaiza, ng'amalire emyanka 38 nga mulwaire.

6 OYesu oweyaboine omusaiza oyo ng'alambaire awo, era n'amanya ati yabbaire atyo okumala ekiseera kinene, n'amukoba ati, "Otake okulama?"

7 Omulwaire n'amwiramumu ati, "Sebo, nze ndambaku omuntu ambeera okugwa omu kidiba omu kiseera ekyo owebakuyugiramumu amaizi.

---

\* 5:2 5:2 *Omulyango gw'entaama*, niimwo omu babilityanga entaama nga baaba okugisadaaka. † 5:2 5:2 *Bbetizata*, lizwa mu liina bati, *Bbesuzasa*, ooba *Bbesesida*, ooba *Bbesesuda*, ooba *Bbesusaida*. ‡ 5:4 5:4 EBiwandiike ebimo eby'eira bibulamu ebibono ebiri omu bukita.



Mba-so nkaali ngalagatana okugwamu, ogondi n'ansookamu.”

<sup>8</sup> Awo oYesu n'amukoba ati, “Osetuke, weetiike omukeekagwo, era otambule oyabe.”

<sup>9</sup> Era omusaiza oyo n'alamirawo, n'aginga omukeekagwe, n'atambula n'ayaba.

Olunaku olwo lwabbaire ku Saabbaato.

<sup>10</sup> Kale aBayudaaya ni bakoba omusaiza oYesu oguyalamirye bati, “Olwatyanu Saabbaato, era amateeka tigakwikirirya okwetiika omukeekagwo.”

<sup>11</sup> Neye iye n'abairamu ati, “Omusaiza andamirye, niiye ankobere ati, ‘Weetiike omukeekagwo, era otambule oyabe.’ ”

<sup>12</sup> Kale awo ni bamubuulya bati, “Musaizaki oyo akukobere okwetiika omukeekagwo, era ati otambule oyabe?”

<sup>13</sup> Cooka omusaiza oYesu oguyalamirye yabaire tamaite amulamirye olw'okubba n'oYesu yabaire agoteire omu kiziima ky'abantu ekyabaire awo.

<sup>14</sup> Oluzwanyumaku, oYesu yaajiirye omusaiza nago omu Yeekaalu, era n'amukoba ati, “Aale obone, ngoyo tete oli kusani. Aale toirangayo okukola ekibbikibbi, neye owewaliirayo ekigosi ekikiraku kidi kyezya okukubbaaku.”

<sup>15</sup> Awo omusaiza nago n'ayaba n'akobera aBayudaaya ati oYesu niiye eyabbaire amulamirye.

<sup>16</sup> Kale awo, abeekubbemberi b'aBayudaaya ni batandiika okuyiiga oYesu okumwita iye

olw'okulamyā omuntu oku Saabbaato, ikyo ekyabbaire ekivuna amateeka g'eSaabbaato.

17 Neye iye oYesu n'abairamu ati, "Obanga oBbaabba iye akola bulijo paka lwatyanu, kaisi nze?"

18 Ikyo ekyo kyongairemu Bayudaaya abo maani okugezyaku okumwita. Ekyo kyabbaire kityo olw'okubba nti, oYesu tiyabbaire avunire mateeka g'eSaabbaato kyonkani, neye era ng'akoba ati oKibbumba niye oIteeye onanyereyeere. Kale mwekyo n'abba yeesuca okubba yenkanankana n'oKibbumba.

### *Obwezye bw'oMwana wa Kibbumba*

19 Awo oYesu n'abasonzolera ati, "Mbakobera amazima nti oMwana mpaawo ekyayezya okukola okululwe, wazira ekyo ekyabona ng'oIteeye akola. Era iye oIteeye ekyakola, niikyo oMwanawe yena ekyakola.

20 Ekyo kityo olw'okubba oIteeye w'oMwana oyo, amutaka era amulaga ebyakola kaisi iye oMwana akole ebintu byonabyona oIteeye onyere ebyakola. Era mwewunye n'akinu muti yalimulaga okukola eby'amaani n'ebikiraku n'ekyo ekyokulamyā omusaiza oyo.

21 Era ng'oIteeye owaazuukiza, atyo n'oMwanawe niye owaagabira abo abeyeesiimira obwomi obutawaawo.

22 Tete n'ekindi kiri kiti oIteeye mpaawo kadi moiza ogwasalira omusango, wazira iye oMwanawe niye oguyawaire obwezye okusala emisango gyonagyona.

<sup>23</sup> Ekyo kityo kaisi abantu bonabona bayezeye okuwa oMwana ekitiisya ekyo ekibawa oIteeye. Era singa omuntu yenayena tawa oMwana ekitiisya era mazima abba tawa n’oIteeye ekitiisya, iye nago eyamutumire.”

<sup>24</sup> Awo oYesu ni yeeyongera ati, “Era mbakobera amazima nti iye oyo awulira ebibono byange, n’aikirirya oyo eyantumire, abba n’obwomi obutawaawo, era tibalimusingsiya omusango. Abba azwire omu kufa, n’asuna obwomi obutawaawo.

<sup>25</sup> Era mbakobera amazima nti ekiseera owekiri awo kituukire, abafu owebaliwulira eigono ly’oMwana wa Kibbumba ni basuna obwomi obutawaawo.

<sup>26</sup> Iye oKibbumba ali n’obwezeye obugabira omuntu obwomi, era obwezeye obwo nago yabuwaire oMwanawe.

<sup>27</sup> Era yamuwaire n’obwezeye okusalira abantu emisango olw’okubba Mwana wa Muntu.

<sup>28</sup> “Era ekyo timwakyewunya olw’okubba ekiseera kiiza, bonabona abafu owebaliwulirira eigonolye,

<sup>29</sup> era ni bazwa e magombe. Ibo abakola ebisa, balizuukira ni basuna obwomi obutawaawo. Neye ibo abo abakola ekibbikibbi, balizuukira ni babasingisya omusango.

<sup>30</sup> Era nze mpaawo ekimpezya okukola okulwange. Nsala omusango ng’oKibbumba obwankoba. N’olwekyo ensala yange ya bwenkanya olw’okubba nkolera ku kiidi

iye oodi eyantumire ekyasiima, tiku ninze ng’owembona.”

*Ibo abakakasa ikyo oYesu ekyali*

<sup>31</sup> Awo oYesu ni yeeyongera ati, “Aale singa ninze zenkani nga mpaawo gondi akobera abantu ebinkwataku, timwandibbaire mukakasa ikyo ekineyeeta.

<sup>32</sup> Neye waliwo ogondi akobera abantu ebinkwataku. Iye oyo nago Kibbumba era mmaite nti obujulizibwe obunkwataku butuuce.

<sup>33</sup> Cooka inywe mwatumire abakwenda egiri oYokaana, neye era yena n’awa obukakafu ikyo ekyendi.

<sup>34</sup> Ekyo tinkikoba lwakubba ntaka bujulizi ibwo obwa muntu-obuntu, neye ntumula oku bujulizi bwa Yokaana kaisi mwezye okwikirirya era mulokoke.

<sup>35</sup> Ibwo obukwenda oYokaana obuyabaleeteire bwabbaire ooti itaala eryaka okubamolekera era bwabazwereiremu okubba basangaali okumalaku kaseera-buseera.

<sup>36</sup> “Neye ndi n’obukakafu obukiraku obwo oYokaana obuyantumwireku. Era obukakafu nago bubonekera mu mulimo ogw’amaani nago oBbaabba oguyampaire okutuukirirya era n’ebintu ebinkola bikakasa biti nze oBbaabba dala yantumire.

<sup>37</sup> Era oBbaabba iye eyantumire, onyere akakasa ikyo ekyendi. Inywe timuwulirangaku eigonolye, waire okumubonaku amaiso oku maiso.

<sup>38</sup> Era n'omu myoyo gyanywe mpaamu eki-bono kya Kibbumba nago olw'okubba oyo oguy-atumire timumwikiririyamu.

<sup>39</sup> “Cooka inywe mwekenenya nga musoma eBiwandiike olw'okubba museega muti omu Biwandiike nago niimwo omu mwalisuna obwomi obutawaawo, era oomwo niimwo omu bakakasira ebinkwataku.

<sup>40</sup> Cooka inywe tete mugaana okwiza egyendi kaisi mwezye okusuna obwomi obutawaawo.”

<sup>41</sup> Awo oYesu ni yeeyongera ati, “Tintumula lwakutaka bantu kumpuuja,

<sup>42</sup> neye nze mbategeera era mmaite nti inywe omu myoyo gyanywe, oKibbumba iye timumutaka.

<sup>43</sup> Aale mubone eenu, nze naizire omu lina lya Bbaabba, neye timwanjanirizire. Neye singa omuntu ogondi obwaiza okululwe, oyo iye mumwaniriza.

<sup>44</sup> Aale atyanu mwezya mutya okunjikiririyamu, nga mwikirirya kuwujangana okwanywe inywe abananyere, kaisi nga timufa ku kuudi okuzwa egiri oKibbumba oyo omoiza yenkani?”

<sup>45</sup> Era oYesu ni yeeyongera ati, “Neye timuseega muti ninze enalibalopa e wa Bbaabba. Wazira abalopa, iye Musa inywe ogumulimu eisubi okubawozererya.

<sup>46</sup> Aale owekibba nti mwaikiririye omu Musa, zena mwandibbaire munjikiririyamu olw'okubba iye yena yampandiikireku.

<sup>47</sup> Neye owemubbanga timwikirirya ebiyawandiikire, aale tete mubba mwaikirirya

mutya ebinkoba?”

## 6

*OYesu aliisya abantu 5,000*

*(Mat 14:13-21; Mak 6:30-44; Luk 9:10-17)*

<sup>1</sup> Ekiseera owekyabitirewo ebyo nga biwoire, oYesu n’asalamu enyanza oGaliraaya, eriina erindi bati Tibberiyi, n’ayambuka okwitale kudi.

<sup>2</sup> Era ekiyindi ky’abantu kinene ni kimusen-gererya olw’okubba baboine obumanyiciryo bw’ebywunyo obuyabbaire akolere omu kulama abalwaire.

<sup>3</sup> Awo oYesu n’abeegibe ni baniina oku kasozi, era n’atyama eeyo aamo nabo.

<sup>4</sup> Omu kiseera ekyo oMukolo ogw’aBayudaaya ogw’oKutambukirya, gwabbaire guli kumpi okutuuka.

<sup>5</sup> Kale awo oYesu n’agangamula omutwe, era n’abona ekiyindi ky’abantu nga kyaba e gyali, kaisi n’akoba oFiripo ati, “Twagula yaina ekyokulya, abantu abo bonabona ekibaalya?”

<sup>6</sup> OYesu ekyo yakibwirye kugezesya Firipo olw’okubba oYesu iye yabbaire amaite ekyayaba okukola.

<sup>7</sup> OFiripo n’amwiramumu ati, “Waire singa tubbaire n’edinaali\* 200 okugula ekyokulya buli muntu okusunaku waire katonu, era tikimala.”

<sup>8</sup> Awo ogondi oku beegibe nga niiye Andereya omuganda wa Simooni Peetero, n’asiiryaku eigono ng’akoba oYesu ati,

---

\* **6:7 6:7 Edinaali** emoiza yaabbanga niiyo empeera y’omupakasi ey’olunaku.

9 “Aanu waliwo omwisuka alikuuwo n'emigaati mitaanu egibasumbire omu busye bwa bbaale,† n'enyanyi ibiri. Neye oku bantu abangi bati, ebyo-so bigasa niki?”

10 Iye oYesu n'akoba ati, “Mutyamisye abantu.” Omu kifo ekyo wabbairewo eisubi lingi erisa ly'okutyamaku. Awo abantu bonabona ni batyama. Ibo abasaiza bonkani ababbairewo babbaire ooti 5,000.

11 Awo oYesu n'aginga obugaati nago budi, ni yeebalya oKibbumba kaisi n'awa abeegibe ni babugabira abantu nga batyaime. Era n'oku bukafingiri n'akola atyo. Bonabona ni basuna ng'owebatakire.

12 Owebamalire okwikuta, n'akoba abeegibe ati, “Mukumbaanirirye ebitudutundu ebifikireku okutabebenyeya ekyokulya nago.”

13 Kale ni babukumbaanirirya, era ni baizulya ebiiho ikumi na bibiri eby'ebitundutundu eby'obugaati obutaanu obwa bbaale obwafikireku nga bamalire okulya.

14 Awo oluzwanyuma abantu owebaboine akamanyiciryo k'ekywunyo oYesu akeyakolere, ni batandiika okutumula bati, “Dala onu niye onaabbi oodi oMusa oguyatumwireku ati yaliiza oku kyalo!”

15 Kale oYesu oweyategeire ati babbaire batira okwaba okumukwata bamwazye bamusuuce kabaka, tete era n'abazwaku ni yeeyongerayo e ngulu oku kasozi, n'abba eeyo yenkani.

---

† 6:9 6:9 *Obbaale*, Akula ooti mwemba era iye w'ebbeeyi ntono ino oku ngaano.

*OYesu atambula oku maizi  
(Mat 14:22-33; Mak 6:45-52)*

<sup>16</sup> Awo esaawa egyeigulo owegyatuukire, abeegi ba Yesu ni baserengeta oku nyanza oGaliraaya,

<sup>17</sup> ni baniina omu lyato, ni basalamu enyanza okwaba omu kibuga e Kaperenawumu. Omu kiseera ekyo obwire bwabbaire nga bwirugaire era oYesu yabbaire akaali okubeegaitaku.

<sup>18</sup> Era ogumpunga ogw'amaani gwabbaireku, era amayengo ni geyongera okubba g'amaani oku nyanza.

<sup>19</sup> Awo owebabbaire bankavugaku ekiromita ooti ina ooba itaanu, ni babona oYesu ng'atambula oku maizi, ng'asembera okumpi n'eryato. Era owebamuboine ni batya ino.

<sup>20</sup> Neye iye n'abakoba ati, "Ninze, timwatya!"

<sup>21</sup> Kale awo babbaire bataka okumwingirya omu lyato, amangu ago eryato ni lituuka oku lukalu egibabbaire baaba.

*Abantu banoonia oYesu*

<sup>22</sup> Oku lunaku olwairireku, ekiziima eky'abantu ababbaire basigaire oku lubba ludi olw'enyanza ni banoonia oYesu nga tibamubona. Kale awo ni beebukirya bati omu lyato eryabbairewo, oYesu tiyaniiniremu okwabira aamo n'abeegibe, wazira abeegibe baabire bonkani.

<sup>23</sup> Awo ni wabbaawo amaato agandi agazwire e Tibberiyi, ni gatuuka okumpi n'ekifo ekyo nago abantu owebaliriire obugaati, ng'oMusengwa oYesu amalire okwebalya oKibbumba.



24 Kale abantu owebamanyicirye bati oYesu n'abeegibe babulawo, ni baniina omu maato ago okwaba e Kaperenawumu okumunoonia.

*OYesu niiye ekyokulya eky'obwomi*

25 Awo abantu owebaajiirye oYesu oku lubba ludi olw'enyanza, ni bamubuulya bati, "Musesya, waizire eenu di?"

26 Iye oYesu n'abairamu ati, "Inywe mbakobera amazima nti timunnoonia olw'okubba mwaboine obumanyiciryo obw'ebwonyo obunkola, neye munnoonia lwakubba mwaliire obugaati budi ni mwikuta.

27 Timwemaliranga mu kukolerera kusuna kyokulya ekibebenyeka, wazira mwemalirenge mu kukolerera kusuna kyokulya kidi eky'omwoyo abantu ekibalya ni basuna obwomi obutawaawo. Iye agaba ekyokulya ekyo nago niiye oMwana wa Muntu. Ekyo kityo olw'okubba niiye oKibbumba iye oIteeye oguyawaire akamanyiciryo k'obwezye obwo."

28 Awo ni bamubuulya bati, "Tuteekwa kukola niki okutuukirirya ebyo oKibbumba ebyataka?"

29 Iye oYesu n'abairamu ati, "Ikyo oKibbumba ekyataka mukole, niikyo kinu; kwikiririrya mu Mwana wa Muntu iye oyo oguyatumire."

30 Awo niibo bona okumubuulya bati, "Kamanyiciryo k'ekywonyoki iwe akewatuwa, tukibone kaisi twezye okwikirirya ebyokoba? Era niki ekyoyezya okukolawo?"

31 Ibo abazeiza baiswe baliire ekyokulya ekiyeeta emaanu omwidungu, ng'owekikoba omu

Kiwandiike kiti, ‘Yabawaire ekyokulya okuzwa omwigulu balye.’ ”

<sup>32</sup> Awo oYesu n’abakoba ati, “Mbakobera amazima nti oMusa tiniye eyawaire abazeiza baanywe ekyokulya okuzwa omwigulu, wazira oBbaabba niiye agaba ekyokulya ekituuce okuzwa omwigulu.

<sup>33</sup> Ekyo kityo olw’okubba ekyokulya oK-ibbumba ekyagaba, niiye oyo oguyatumire okuzwa omwigulu era agabira abantu obwomi obutawaawo.”

<sup>34</sup> Awo niwo ibo okumukoba bati, “Sebo, okuzwa olwatyanu otuwenge kyokulya ekyo nago.”

<sup>35</sup> Iye oYesu n’alampirira ati, “Ninze ekyokulya eky’obwomi obw’omwoyo bw’omuntu. Era iye aiza egyendi era n’anjikiririryamu, enzala waire nyonta tiyalimumaku kadi.”

<sup>36</sup> Era oYesu ni yeeyongera n’abakoba ati, “Era nga mbakobeire, mumboine era musigaire nga timunjikiririryamu.

<sup>37</sup> Abantu bonabona oBbaabba abampa baiza egyendi, era buli aiza egyendi, tinalimubbinga.

<sup>38</sup> Ekyo kityo olw’okubba tinaizire okuzwa omwigulu kukola bintaka, neye naizire kukola biibyo oKibbumba oyo eyantumire ebyataka.

<sup>39</sup> Era binu niibyo ebintu eyantumire ebyataka, tataka ngotyeku kadi muntu omoiza kwabo abeyampaire, neye ataka mbazuukize oku lunaku oluyalisaliraku emisango.

<sup>40</sup> Kale oBbaabba ekyataka kiri kiti, buli muntu ategeera ati ndi Mwana wa Kibbumba

n'anjikiririryamu asuna obwomi obutawaawo, era nalimuzuukiza oku lunaku olwenkomerero."

<sup>41</sup> Awo abeekubbemberi b'aBayudaaya ni beezulugumira oYesu olw'okubba yakobere ati, "Ninze ekyokulya ekyazwire omwigulu."

<sup>42</sup> Era nga bakoba bati, "Omusaiza onu tiniye oYesu omwana wa Yusufu? Oiteeye n'omaaye tubamaite. Kale ayezya atya atyanu okukoba ati, 'Nazwire omwigulu?' "

<sup>43</sup> Iye oYesu n'airamu ati, "Mulekeraawo okwezuluguma abanyere oku banyere.

<sup>44</sup> Mpaawo ayezya okwiza egyendi wazira nga oBbaabba eyantumire niye amulungamirye, era nze nalimuzuukiza oku lunaku olw'enkomerero.

<sup>45</sup> Bakiwandiikire omu kitabo ky'abanaabbi bati, 'Bonabona oKibbumba yalibeegeya.' Kale buli awulira oBbaabba era n'ayega, aiza egyendi.

<sup>46</sup> Mpaawo muntu abonangaku oBbaabba oku-toolaku oyo eyazwereire omwigulu.

<sup>47</sup> "Mbakohera amazima nti oyo anjikiririryamu, asuna obwomi obutawaawo.

<sup>48</sup> Ninze ekyokulya eky'obwomi obw'omwoyo.

<sup>49</sup> Abazeiza baanywe baliire emaanu omwidungu, era ni bafa.

<sup>50</sup> Neye kiinu ekyokulya ekizwa omwigulu, ikyo omuntu ekyayezya okulya nandi n'afa.

<sup>51</sup> Nze ninze ekyokulya eky'obwomi obw'omwoyo ekyazwire omwigulu. Era singa omuntu yenayena alyaku ekyokulya ekyo, yalibba mwomi emirembe n'emirembe. Era ekyokulya ekyo nago, niigwo omubiri gwange

ogunaliwaayo olw'abantu b'oku kyalo okusuna obwomi bw'omwoyo."

<sup>52</sup> Awo abeekubbemberi b'aBayudaaya ni banyiiga era ni batandiika okwakana abanyere oku banyere nga bakoba bati, "Omusaiza onu ayezya atya okutuwa omubirigwe okugulya?"

<sup>53</sup> OYesu n'abakoba ati, "Mbakohera amazima nti singa owemutalya omubiri gwa Mwana wa Muntu, era singa timunywa omusaayegwe timwezya okubba boomi emirembe n'emirembe.

<sup>54</sup> Neye oyo alya omubiri gwange, era n'anywa n'omusaaye gwange, abba n'obwomi obutawaawo era nalimuzuukiza oku lunaku lw'enkomerero.

<sup>55</sup> Ekyo kityo olw'okubba omubiri gwange kyokulya ky'omwoyo ekinanyerenyeere, era omusaaye gwange kyokunywa ky'omwoyo ekinanyerenyeere.

<sup>56</sup> "Kale oyo alya omubiri gwange, era anywa omusaaye gwange, abba n'enkolagana na nze, era zena mba n'enkolagana naye.

<sup>57</sup> Era kityo nakimo olw'okubba, ng'oBbaabba eyantumire owaagaba obwomi, nze ndi mwomi ku lwa bwezyebwe. Era n'omu ngeri enanyere eyo, oyo alya omubiri gwange yalibba mwomi ku lwa bwezye bwange.

<sup>58</sup> Era ekyo niikyo ekyokulya ekyazwire omwigulu. Ibo abazeiza baanywe baliire emaanu era ni bafa, neye oyo alya oku kyokulya nze ekingaba, yalibba mwomi emirembe n'emirembe."

<sup>59</sup> Ebyo oYesu yabitumwire oweyabbaire ng'ayegesya abantu omwikumbaaniro e

Kaperenawumu.

*Bangi bazwa oku oYesu*

<sup>60</sup> Awo bangi oku beegibe owebawuliire ebyo, ni bakoba bati, “Enjegesya eyo nga nkakati! Naani ayezya okugiikirirya?”

<sup>61</sup> Neye oYesu yabbaire amaite ati abeegibe beezuluguma olw’enjegesya eyo, kale n’abakoba ati, “Olwo inywe ekyo kibesitalisya?”

<sup>62</sup> Kaisi leero mwaliseega mutya owemwali-bona oMwana wa Muntu ng’aniina okukanga omwigulu egiyazwereire!

<sup>63</sup> Iye oMwoyo wa Kibbumba niye agaba obwomi obutawaawo, neye omuntu tayezya okukola ekintu kyonakyona olw’obwezyebwe okululwe. Era ebibono ebimbakobeire ni-ibyo ebizweraku omuntu okusuna obwomi obutawaawo.

<sup>64</sup> Neye waliwo abamo kwinywe abatan-jikiririryamu.” OYesu yakobere atyo olw’okubba oweyatandiikiire okwegesya, yabbaire amaite abo abatamwikiririryemu, era yabbaire amaite n’ayaba okumulyamu olukwe.

<sup>65</sup> Kale awo ni yeeyongera okutumula ati, “Eyo niyo ensonga lwaki nabakobeire nti mpaawo ayezya okwiza egyendi ng’oKibbumba tamubbeereire.”

<sup>66</sup> Awo okuzwera nakimo omu kiseera ekiy-atumuliiremu atyo, bangi oku beegibe ni bamuzwaku, era ni batairayo okutambulanga naye.

<sup>67</sup> Awo oYesu n’abuulya abeegibe eikumi na babiri ati, “Na inywe nywena mutaka okun-zwaku?”

<sup>68</sup> Iye oSimooni Peetero n'amwiramumu ati, "Musengwa, nga twaba eeri naani? Niiwe wenkani otumula ebibono ebikwata oku ngeri ey'okusuna obwomi obutawaawo.

<sup>69</sup> Era atyanu iswe twikirirya, era tumaite tuti niiwe oMutukulye azwa eeri oKibbumba."

<sup>70</sup> Kale awo oYesu n'abairamu ati, "Tininze enabalonderemu inywe eikumi na babiri? Neye omoiza kwinywe omwoyogwe gulimu oSitaani!"

<sup>71</sup> Yabbaire atumula ku Yuda, omwana wa Simooni Isikalyoti oyo eyabbaire ayaba okumulyamu olukwe, waire nga yabbaire moiza oku beegibe eikumi na babiri.

## 7

### *OYesu ayaba oku Mukolo ogw'oBusiisira*

<sup>1</sup> Ebyo owebyawoire, oYesu n'atambuliranga omu bitundu by'eitwale ly'e Galiraaya nga tasala ensalo okwaba omwitwale ly'e Buyudaaya. Ekyo kityo olw'okubba aBayudaaya babbaire eeyo nga bamwekumire okumwita.

<sup>2</sup> Cooka omukolo ogw'aBayudaaya ogubeeta bati, "Mukolo ogw'oBusiisira," gwabbaire gwatira okutuuka.

<sup>3</sup> Awo abaganda ba Yesu ni bamukoba bati, "Kikwetaagisya ozwe aanu oyabe omwitwale ly'e Buyudaaya kaisi abeegibo bayezye okubona ebyamagero ebyokola.

<sup>4</sup> Ekyo kityo olw'okubba mpaawo muntu abis-abisa ekyakola neenu ng'ataka abantu bamu-manye omu lwatu. Aale ng'owookola ebyam-agero binu, oyabe obikolere n'eeyo yona abantu bonabona bakumanye."

<sup>5</sup> Ibo abagandabe batumwire batyo olw'okubba ibo bona abananyere tibamwikiririyemu.

<sup>6</sup> N'olwekyo oYesu n'abakoba ati, "Ekiseera ekyange ekituuce ekyokwaba eeyo kikaali oku-tuuka. Neye inywe ekiseera kyonakyoona kituuce inywe okweyabira.

<sup>7</sup> Ekyo kityo olw'okubba inywe abantu tibayezya okubacaawa, neye nze bancaawa olw'okubba mbakobera nti ebikole ebibakola bibbibibi.

<sup>8</sup> Inywe mwabe oku mukolo, nze tinaabe ekiseera kinu, olw'okubba ekiseera ekyange eki-tuuce ekyokwabiramu eeyo kikaali okutuuka."

<sup>9</sup> Era oYesu oweyamalire okutumula ebyo, iye n'asigalaku omu Galiraaya.

<sup>10</sup> Neye abaganda ba Yesu owebamalire ok-waba oku mukolo, oYesu yena n'abasenjaaku cooka nga timu lwatu, neye mu mbiso.

<sup>11</sup> Kaisi eeyo oku mbaga nago abeekubbemberi b'aBayudaaya babbaire bamunoonia nga babu-uliriry bati, "Omusaiza oyo nago ali nkonaki?"

<sup>12</sup> Cooka omu kiziima ky'abantu awo, wab-bairewo okumuweetaku nga kungi omu bantu. Abamo nga bakoba bati, "Musaiza musa." Abamo nga ibo bakoba bati, "Bbe, abbeyabbeya abantu."

13 Neye olw'okutya abeekubbemberi b'aBayudaaya, ni watabbaawo amutumulaku omu lwatu.

*OYesu oku Mukolo ogw'oBusiisira*

14 Awo aakati omu naku gy'omukolo, oYesu n'ayaba omu luuga lw'eYeekaalu, era n'atandiika okwegesya abantu.

15 Era aBayudaaya ni beewunya ino engeri egyayegesyamu, era ni beebuulya bati, "Omu-saiza oyo yasunire atya okumanya okwo atyo aate nga tasomangaku kadi by'ediini?"

16 Awo oYesu n'abairamu ati, "Binu ebin-jegesya tibyanje, wazira bizwa eeri Kibbumba iye eyantumire.

17 Singa omuntu yenayena asalawo okukola oKibbumba ebyataka, ategeera obanga ebin-jegesya bizwa eeri Kibbumba, ooba ntumula byange-kuwange.

18 Iye omuntu atumula ebibye okululwe abikola lw'okwenoonerya kitiisya. Neye oyo akolerera kusunisa yoodi eyamutumire kitiisya, abba atumula mazima, era tabbaamu bubbeyi.

19 Kaisi oMusa tiyabawaire aMateeka? Mbona kwinywe nywena mpaawo muntu akwata aMateeka ago. Aale nga inywe mukoba muti mugakwata, lwaki musala amalabuki okunjita?"

20 Awo ekiziima ky'abantu ababbairawo ni bamwiramu bati, "Iwe koizi oliku muzimu! Naani asala amalabuki okukwita?"

21 Iye oYesu n'abairamu ati, "Nze nakolere ekyewunyo kimo oku Saabbaato, nywenany-wena ni kibasisiwalya.



<sup>22</sup> Neye nti nywena oku Saabbaato mukomol-eraku abaana olw'okubba oMusa yabalagiire okukomolanga waire wona tikwatandiikiire ku Musa. Cooka ekinanyerenyeere kiri kiti, okukomola okwo kwatandiikiire ku bazeiza baanywe.

<sup>23</sup> Atyanu obanga bayezya okukomola omwana oku Saabbaato, olw'okutavuna eiteeka lya Musa, aale lwaki munnyiigira nze olw'okulamirya n'akimo omuntu oku Saabbaato?

<sup>24</sup> Kale okumanya ekituuce, timwasalawo kusinzirira ku ngeri egimubibonamu oku ngulu, neye musinzirire ku nsonga entuuce omumaiso ga Kibbumba."

### *OYesu niye oKurisito?*

<sup>25</sup> Awo abamo oku bantu ab'omu Yerusaalemi ababbaire awo, ni batandiika okwebuulyangana bati, "Omusaiza onu tiniye ogubanoonia okwita?

<sup>26</sup> Aate ngonu atumulira mulwatu, era mpaawo n'ekibamukoba. Ab'obwezye bayezya okubba nga bategereire nakimo bati onu niye oKurisito ogubasukireku amafuta?

<sup>27</sup> Neye omusaiza onu iye tumaite egyazwera, aate nga iye oKurisito oweyaliiza, mpaawo eyalimanya egyazwera."

<sup>28</sup> Awo oYesu oweyabbaire ng'akaali ayegesya omu luuga lw'eYeekaalu, n'alangirira ati, "Inywe museega muti mummaite, era muti n'eginzwera mumaiteyo. Aale mumanye muti tinaizire kulwange, wazira oyo eyantumire dala aliyo, cooka inywe oyo ogumutamaite.

29 Neye nze mmumaite olw'okubba nazwire gyali, era niye eyantumire.”

30 Awo ni bagezyaku okumukwata, cooka ni watabbaawo amukubbyaku olw'okubba ekiseer-akye eky'okumukwata kyabbaire kikaali okutuuka.

31 Neye era bangi omu kiziima ky'abantu ababbaire awo ni bamwikiririryamu, nga bakoba bati, “Kaisi nago oKurisito ogubasukireku amafuta oweyaliiza yalikola obumanyiciryo w'ebewunyo obukiraku onu obwakola?”

32 Awo aBafalisaayo ni bawulira ng'abantu baweweeta oku oYesu, kale abakabona abakulu n'aBafalisaayo ni batuma abaisirikale okumukwata.

33 Awo oYesu n'abakoba ati, “Njaba okumala na inywe ekiseera kitono, kaisi njabe egiri oyo eyantumire.

34 Era mwalinnoonia neye timwalimbona, era inywe timwezya okutuuka eginjaba.”

35 Awo abeekubbemberi b'aBayudaaya ni bakobangana bati, “Omusaiza onu ataka kwaba yaina egitutalyezya okumubonera? Ataka kwaba giri bantu baiswe badi abasalaanikiire omu Buyonaani, ayezye okwegesya aBayonaani?

36 Ategeeza niki okukoba ati, ‘Mwalinnoonia, neye timwalimbona,’ era ati, ‘Inywe timwezya okutuuka eginjaba?’ ”

### *Eiruba ly'amaizi ag'obwomi*

37 Oku lunaku olusembayo era nga niirwo olukira obukulu oku Mukolo ogw'oBusiisira, oYesu n'ayemerera, era n'atumula maaminkirira

ati, “Buli muntu enyonta ogweruma, aize egyendi anywe.

<sup>38</sup> Iye yenayena anjikiririryamu ayezya okwiza n’anywa. Ekyo kityo olw’okubba eKiwandiike kikoba kiti: ‘Eiruba ly’amaizi ag’obwomi obutawaawo lyalikulumuka nga lizwa omu omuntu oyo nago.’ ”

<sup>39</sup> Ekyo oYesu yakitumwire ng’ategeeza Mwoyo oMutukulye abamwikiririryamu ogubabbaire baaba okusuna egibwizaku. Paka omu kiseera ekyo, babbaire bakaali okubawa oMwoyo oMutukulye olw’okubba nti oKibbumba yabbaire akaali okugulumalya oYesu.

*Obutategeragana kw’abantu oYesu ekyali*

<sup>40</sup> Kale awo abantu b’omu kiziima ekyo owebawuliire ebibono ebyo, abamo ni bakoba bati, “Dala onu niye onaabbi oodi ogubatusuubizire.”

<sup>41</sup> Ibo abandi ni bakoba bati, “Onu niye oKurisito ogubasukireku amafuta.” Kaisi abandi ni batala-butali bati, “OKurisito ogubasukireku amafuta ayezya atya okuzwa mu Galiraaya?”

<sup>42</sup> Ikyo eKiwandiike tikikoba kiti yalizwa mwibyaire lya Dawudi, era balimubyalira mu Bbeserekeemu, ikyo ekibuga omu babyala oDawudi?”

<sup>43</sup> Kale omu ngeri eyo abantu ni batuuka omu butategeragana olwa Yesu.

<sup>44</sup> Era awo abamo kwibo ni bataka okumukwata, neye era ni watabbaawo amukubbyaku.

---

**7:37 7:37** Lee 23:36      **7:38 7:38** Zek 47:1; Zak 14:8; Isa 44:3; 55:1; 58:11      **7:40 7:40** Ama 18:15,18; Mal 4:5-6      **7:42 7:42** 2Sa 7:12; Mik 5:2

*Obutaikirirya  
b'aBayudaaya*

*bw'abeekubbemberi*

<sup>45</sup> Awo ekyazwiremu abaisirikale abakuumi b'eYeekaalu ni bakanga egiri abakabona abakulu n'aBafalisaayo. Kale ibo ni babuulya abaisirikale bati, "Lwaki timumuleetere?"

<sup>46</sup> Abaisirikale ni bairamu bati, "Mpaawo muntu eyabbaire atumwire eby'amaani ooti bi-idi oodi ebyatumula!"

<sup>47</sup> ABafalisaayo ni babairamu bati, "Ekimutegeeza muti inywe nywena abaliibirye?"

<sup>48</sup> Inywe mwabbaire muboineku iswe abafugi baanywe, ooba oMufalisaayo yenayena ng'amwikiririryamu?

<sup>49</sup> Naire! Okutoolaku ekikoosi ky'abantu abatamaite amateeka ga Musa, kaisi nago ekikoosi ekiraame!"

<sup>50</sup> Kale iye oNikodemu omoiza kwibo nago abeekubbemberi b'aBayudaaya, era iye enyumaku eyaabire obwire egiri oYesu, awo n'abuulya abainaye ati,

<sup>51</sup> "Amateeka gaiswe\* gaikirirya okusalira omuntu omusango nga bakaali okumuwozesya n'okutegeera ekisobyoye ekyakolere?"

<sup>52</sup> Ibo ni bamwiramumu bati, "Kaisi wena ozwera mwitwale ly'e Galiraaya? Weekeenye eBi-wandiike. Ala omanyaye oti e Galiraaya mpaawo naabbi azwerayo." [

<sup>53</sup> Kale awo buli muntu n'akanga e wuwe.

---

**7:50 7:50** Yok 3:1-2 \* **7:51 7:51** Ooba, *AMateeka ga Musa*.

## 8

*Omukali ogubakwatiire omu bulendi*

<sup>1</sup> Awo iye oYesu n'ayaba oku Lusozi olw'eMisaale eMizaituuni.

<sup>2</sup> Kaisi amakeezi pwi n'akanga omu luuga lw'eYeekaalu, era abantu bonabona ni baaba e gyalu, kale n'atyama okubeegesa.

<sup>3</sup> Yabbaire akaali ali aawo abakugu omu by'aMateeka ga Musa n'aBafalisaayo ni baleeta omukali ogubakwatiire omu bulendi, awo ni bamuteeka aakati bonabona awebayezya okumubonera.

<sup>4</sup> Awo ni bakoba oYesu bati, "Musomesya, omukali onu bamukwatiire omu kikole ky'obulendi.

<sup>5</sup> Cooka omu Mateeka, oMusa yatulagiire kubakubbanga n'amabbaale ni bafa abakali abebakwatira omu bulendi. Atyanu iwe okoba otya kwekyo?"

<sup>6</sup> Ibo abakugu bakoleserye ekibuulyo ekyo ng'akatego, kaisi basune ekibazweraku okumu-loopa.

Neye oYesu omu kityamo awo n'akotama kaisi n'atandiika okuwandiika ansi n'olunwe.

<sup>7</sup> Era abavunaana omukali nago owebeeyongeire okubuulya oYesu ebibuulyo, n'agangamuka kaisi n'abakoba ati, "Owewabbaawo mwinywe atakolangaku ekikole ekibbikibbi niye abbe asooke okukubba omukali oyo eibbaale."

<sup>8</sup> Awo tete oYesu n'akotama, n'awandiika ansi.

<sup>9</sup> Cooka ibo owebawuliire ekyo, ni batandiika okuzwangawo moiza ku moiza, okusookesya n’abakira obukulu kaisi abatobato ni bairan-gaku. Abantu beeyongeire okuzwawo paka oYesu oweyasigaire awo yenkani n’omukali nago nga iye akaali ayemereire awo.

<sup>10</sup> Kale awo tete oYesu n’agangamuka, kaisi n’abuulya omukali nago ati, “Mukali iwe, banu bali yaina? Mpaawo agukusingisiryey?”

<sup>11</sup> Iye omukali nago n’amwiramumu ati, “Mpaawo sebo.” Awo oYesu n’amukoba ati, “Na nze zena tingukusingisya. Aale atyanu weeyabire, neye olekewo empisa y’okukolanga ekibbikibbi.”]\*

### *Obutuuce bw’obujulizi bwa Yesu*

<sup>12</sup> OYesu tete oweyabbaire atumula n’abantu, yabakobere ati, “Ninze ekitangaala ekimolekera abantu. Era buli ansengererya tatambulirenge omu ndikiirya, wazira namulungamyanga omu nzira ereeta obwomi.”

<sup>13</sup> Awo aBafalisaayo ni bamukoba bati, “Iwe onyere weetumulaku anambula gondi akakasa ebyotumula, kale ebiwetumulaku tibikola.”

<sup>14</sup> Iye oYesu n’abairamumu ati, “Waire nga ninze onyere owenetumulaku, ebintumula bitu-uce olw’okubba mmaite eginazwire n’eginjaba. Neye inywe timumaiteku eginazwire, waire eginjaba.

<sup>15</sup> Inywe musala omusango kusinzirira ku malabuki g’obuntu, cooka nze mpaawo muntu ogunsalira omusango.

---

\* **8:11 7:53-8:11** EBiwandiike ebimo bibulamu enyiriri ginu.

**8:12 8:12** Mat 5:14; Yok 9:5      **8:13 8:13** Yok 5:31

16 Neye singa owemba kusala musango, ensala yange ebba ntuce olw'okubba timba zenkani. Nze mbaawo n'oBbaabba eyantumire.

17 Ebyo nga biri awo n'omu Mateeka gaanywe ag'eKiyudaaya, bakiwandiikire bati obujulizi bw'abantu ababiri ng'abufaanana bukakasa buti ekibutumulaku kituce.

18 Nze nkobera abantu ebinfaaku kaisi ogondi abakobera ebinfaaku niye oBbaabba eyantumire."

19 Awo ni bamubuulya bati, "Oiteewo ali yaina?" OYesu n'abairamu ati, "Nze timuntegeera, kadi Bbaabba yena timumutegeera. Aale singa nze mubbaire muntegeera, n'oBbaabba yena mwandibbaire mumutegeera."

20 Ebibono ebyo oYesu yabitungwire oweyabbaire ng'ayegesya omu luuga lw'eYeekaalu okumpi n'ekifo egibaweranga ebirabo. Neye era omu kaseera ako tiwabbairewo waire moiza amukwata, olw'okubba ekiseerakye eky'okumukwata kyabbaire kikaali okutuuka.

*OYesu atumula oku kufaakwe*

21 Awo tete oYesu n'akoba abeekubbemberi b'aBayudaaya ati, "Nze ndi kuzwawo, kaisi era inywe mwalinnoonia, era mwalifeera omu kibbikibbi kyanywe. Era nze eginjaba inywe timwezya okwabayo."

22 Kale awo abeekubbemberi b'aBayudaaya ni beebuulyangana bati, "Ayaba kweita? Ekyo

niikyo ekyategeeza okukoba ati, ‘Nze eginjaba, inywe timwezya okwabayo?’ ”

<sup>23</sup> Awo oYesu ni yeeyongera okukoba aBayudaaya abo nago ati, “Inywe muli b’oku kyalo kunu, neye nze nazwire mwigulu. Inywe muli b’oku kyalo, neye nze tindi w’oku kyalo.

<sup>24</sup> Ekyo niikyo ekigira mbakobeire nti mwalifeera omu bikole byanywe ebibbibbi. Era dala mwalibifeeramu okutoolaku nga mwikiri-irye muti ninze oyo ng’owenetumulaku.”

<sup>25</sup> Awo ni bamubuulya bati, “Weeyeta otya?” OYesu n’abairamu ati, “Ninze oyo ogumbakoberanga nenca okuzwera nakimo owenatandiikiire okutumula na inywe.

<sup>26</sup> Cooka nandibbaire mbatumulaku bingi era n’okubasingisya omusango, neye eyantumire mwesigwa era ekinasunire okuzwa egyali niikyo ekinkobera abantu.”

<sup>27</sup> Era aBayudaaya abo nago tibategeire bati oYesu yabbaire abakobera kwIteeye oKibbumba.

<sup>28</sup> Kale awo oYesu ni yeeyongera ati, “Owemwalimala okwanika oMwana wa Muntu oku musalabba, kaisi awo niiye owemwalitegeerera muti ninze oyo ng’owenetumulaku. Era wemwalitegeerera muti nze mpaawo ekinkola okulwange, neye ntumula biiby o ebinanyerenyeere oBbaabba ebiyanjegeserye.

<sup>29</sup> Era nago oyo eyantumire ali na nze, tandekanga zenkani, olw’okubba bulijo nkola biiby ebimusangaalya.”



<sup>30</sup> Era oYesu n’oweyabbaire atumula ebyo, abantu bangi ni bamwikiririryamu.

*Abagalama n’abatali bagalama*

<sup>31</sup> Awo oYesu n’akoba aBayudaaya ibo ababbaire bamwikiririiryemu ati, “Singa owemugumira oku bintu ebimbeegesa, mubbeera nakimo beegi bange.

<sup>32</sup> Era awo mwalimanya amazima agazwa e wa Kibbumba, era n’amazima ago galibatoola omu bugalama ni gabasuuca ab’eidembe.”

<sup>33</sup> Awo aBayudaaya ni bamwiramumu bati, “Iswe tuli baizukulu ba Ibbulaimu, era titubbangaku bagalama b’omuntu yenayena. Atyanu obba otya okutukoba oti twasuuka b’eidembe?”

<sup>34</sup> Iye oYesu n’abairamu ati, “Mbakobera amazima nti buli akola ekikole ekibbikibbi, abba mugalama w’ekikole ekibbikibbi.

<sup>35</sup> Era iye omugalama tabba w’enkalaakalira omu kisito oomwo, neye omwana abba waamu emirembe n’emirembe.

<sup>36</sup> N’olwekyo oMwana wa Kibbumba owaba-suuca ab’eidembe okuzwa omu bugalama obwo, mwalibba b’eidembe ino.

<sup>37</sup> Inywe mukoba muti muli baizukulu ba Ibbulaimu, aate nga musala amalabuki okunjita olw’okubba ebintu ebinjegesa timubiikirirya.

<sup>38</sup> Cooka nze mbakobera ebinaboine e wa Bbaabba, na inywe mukola bya itewaanywe oSitaani ebyabakoba.”

<sup>39</sup> Awo ibo ni bamwiramumu bati, “Iswe ozeiza waiswe Ibbulaimu.” Iye oYesu niye okubakoba

ati, “Singa mubbaire baizukulu ba Ibbulaimu, mwandibbaire mukola oIbbulaimu ebiyakolere.

<sup>40</sup> Neye era kityo wekiri olw’okubba muli bamaliriri okunjita, cooka nze omusaiza abakobeire amazima agenawuliire okuzwa eeri oKibbumba. Iye oIbbulaimu ebyo tiyabikolere.

<sup>41</sup> Inywe mukola biiby oitewaanywe ebyakola.”

Ibo ni bamukoba bati, “Iswe tituli baana b’e nza, tuli baana bananyerenyeere aba Kibbumba.”

<sup>42</sup> Iye awo oYesu n’abakoba ati, “Singa dala muli baana ba Kibbumba, mwankubbaire muntaka olw’okubba nazwire giri Kibbumba, era tinaizire kulwange, wazira iye onyere niye eyantumire.

<sup>43</sup> Aale lwaki mubba timutegeera ebintumula? Timwezya okubitegeera olw’okubba timutaka okubiikirirya.

<sup>44</sup> Cooka inywe muli ba itewaanywe oSitaani, era muyayaanira kukola biiby oitewaanywe ebyasiima. Iye okuzwera nakimo owebabumbiire ekyalo iye mutemo, era iye tagumira oku mazima ga Kibbumba olw’okubba mwiye mpaamu mazima. Era owaatumula obubbeyi, abba atumula kiidi eky’ekikulakye olw’okubba iye mubbeyi, era niye okibyali w’obubbeyi.

<sup>45</sup> Neye nze olw’okubba ntumula amazima ga Kibbumba, timwikirirya ebinkoba.”

<sup>46</sup> Era awo ni yeeyongera ati, “Waliwo kwinywe ayezya okunnumiriza ekibbikibbi? Aale owemba nti ntumula mazima, lwaki timwikirirya ebinkoba?”

<sup>47</sup> Iye omuntu wa Kibbumba, awulira ebi-bono bya Kibbumba. Kale inywe ekigira ni mutawulira oKibbumba, kiri kiti, timuli ba Kibbumba.”

*OYesu n’oIbbulaimu*

<sup>48</sup> Awo abeekubbemberi b’aBayudaaya ni bairamu oYesu bati, “Tituli batuuce okukoba tuti oli ooti Musamaaliya era oliku muzimu?”

<sup>49</sup> Iye oYesu n’abairamu ati, “Nze tindi ku muzimu, wazira nteekamu oBbaabba ekitiisya, neye inywe mumbityamu amaiso.

<sup>50</sup> Nze tindi kwenoonyanga kitiisya mwinywe. Neye waliwo oodi, aate nga niye omulamuzi omu nsonga eenu, ali kutakanga ati nze bampe ekitiisya.

<sup>51</sup> Cooka mbakobera amazima nti singa omuntu yenayena akwata ekibono kyange tiyalifa emirembe n’emirembe.”

<sup>52</sup> Awo aBayudaaya abo nago owebawuliire ebyo ni bamukoba bati, “Atyanu tukakasiire nakimo tuti oli mugwairalu! Obanga oIbbulaimu yafiire, era n’abanaabbi bona bafiire, kaisi iwe n’okoba oti omuntu yenayena akwata ekibonokyo tiyalirega oku kufa naire!

<sup>53</sup> Iwe okiraku ozeiza waiswe oIbbulaimu? Obanga iye yafiire era n’abanaabbi bona bafiire! Iwe weeyeta otya?”

<sup>54</sup> Iye oYesu n’abairamu ati, “Singa nze owenegulumalya, ekitiisya kyange kibba kinambulamu. Cooka iye oBbaabba, oyo inywe ogumukoba muti niye oKibbumba waanywe, niye angulumalya.

<sup>55</sup> Waire inywe timumutegeera, neye nze mmutegeera. Era singa nkobere nti timmumaite, nandibbaire mubbeyi ooti niinywe. Neye nze mmumaite, era nkwata ekibonokye.

<sup>56</sup> Iye ozeiza waanywe oIbbulaimu oweya-manyicirye ati baaba okuntuma oku kyalo ya-jaagaanire era n'abba ng'akirengerera yala omu mwoyogwe era oweyakiboine n'abba musangaali."

<sup>57</sup> Awo abeekubbemberi b'aBayudaaya nago ni bamukoba bati, "Iwe akaali okwerya emyanka 50 egy'obukulu, era waboineku oIbbulaimu!"

<sup>58</sup> OYesu n'abakoba ati, "Mbakohera amazima nti oIbbulaimu babbaire bakaali n'okumubyala, nga nze ndiwo."

<sup>59</sup> Awo owebawuliire ekyo ni bakwata amabbaale okumukubba, neye oYesu ni yeebisa, era n'awuluka okuzwa omu luuga lw'eYeekaalu.

## 9

### *OYesu alamyā ogubabyaire nga mwofu*

<sup>1</sup> Awo oYesu oweyabbaire atambula n'abeegibe, n'abona omusaiza ogubabyaire nga mwofu.

<sup>2</sup> Ibo abeegibe ni bamubuulya bati, "Musesesya, oku musaiza oyo n'ababyairebe naani eyakolere ekikole ekibbikibbi ekyagirire ni bamubyala nga mwofu?"

<sup>3</sup> OYesu n'abairamu ati, "Timusaiza oyo ooba babyairebe niibo abakolere ekikole ekibbikibbi, neye bamubyaire nga mwofu kaisi abantu

bayezye okubona amaani ga Kibbumba nga gakola mwiye.

<sup>4</sup> Aale nga kukaali musana omuntu owaayezyerya okukola, kyetaagisya okukola omulimo gw'oyo eyantumire. N'olwekyo, nkola omu kiseera kinu olw'okubba ekiseera kiiza obwire nga bwirugaire owenalibba nga tinkaali mpezya okukola.

<sup>5</sup> Cooka nze nga nkaali ndi oku kyalo, ninze ekitangaala ekimolekera abantu.”

<sup>6</sup> Awo oYesu oweyamalire okutumula ebyo, n'ayanda ebitanta ansi okwitakali, era n'atuga eitakali eeryo n'ebita, kaisi n'alisiiga oku maiso g'omusaiza omwofu nago.

<sup>7</sup> Awo kaisi n'amukoba ati, “Oyabe onaabe omumaiso oku kidiba ekibeeta oSirowaamu.”\* Kale omusaiza oyo n'ayaba n'anaaba omumaiso era n'akanga e ika ng'abona.

<sup>8</sup> Cooka abaliranwabe n'abantu abandi abamubonanga ng'asabirirya owebamuboine, ni babuulyangana bati, “Omusaiza oyo tiniye eyatyamanga eedi era n'asabiriryanga?”

<sup>9</sup> Era abamo kwibo nago ni bakoba bati niiye. Ibo abandi nga bakoba bati, “Kadi, amufaanana-bufaanani.” Neye omusaiza onyere n'abakakasa ati, “Ninze omusaiza eyabbaire omwofu.”

<sup>10</sup> Kale awo ni bamubuulya bati, “Aale atyanu amaisogo gabbaire gaty'a okubona?”

<sup>11</sup> Awo iye n'abairamu ati, “Omusaiza ogubeeta oYesu niiye eyatugire eitakali kaisi n'alinsiiga oku bitigi. Era n'ankoba okwaba

---

9:5 9:5 Mat 5:14; Yok 8:12 \* 9:7 9:7 Kitegeeza *Ogubatumire*.

oku kidiba oSirowaamu okunaaba omumaiso. N’olwekyo ni njaba, ni naaba, era ni mpezya okubona.”

<sup>12</sup> Awo ibo ni bamubuulya bati, “Omusaiza oyo nago ali yaina?” Iye n’abairamu ati, “Timmaite.”

*Okunoonererya oku kulama kw’omwofu*

<sup>13</sup> Awo abantu abo ni baaba n’omusaiza nago eyabbaireku omwofu eeri abamo oku Bafalisaayo.

<sup>14</sup> Cooka olunaku oYesu oluyatugiiireku eitakali era n’okulamyama amaiso ag’omusaiza nago, lwabbaire ku Saabbaato.

<sup>15</sup> N’olwekyo aBafalisaayo bona ni babuulya omusaiza oyo engeri egiyalamiremu amaiso. Iye n’abairamu ati, “OYesu yatugire itakali n’alinsiiga oku bitigi, kaisi ni njaba ni naabaku era atyanu mbona.”

<sup>16</sup> Awo abamo oku Bafalisaayo ni bakoba bati, “Omusaiza oYesu oyo tiyazwire wa Kibbumba olw’okubba takwata eiteeka ly’eSaabbaato.” Neye abandi ni bakoba bati, “Omuntu akola ebibbibibi ayezya atya okukola obumanyiciryo w’ebywunyo obwenkana awo?” Kale ni wabbaawo okugabukanamu omu biseego.

<sup>17</sup> Awo ekyazwiremu abeekubbemberi b’aBafalisaayo tete ni baira oku musaiza eyabbaire omwofu era ni bamubuulya bati, “Yakulamirye niiwe amaiso. Iwe omutumulaku otya?” Iye n’abairamu ati, “Nseega nti naabbi.”

<sup>18</sup> Neye abeekubbemberi b’aBayudaaya era tibaikiriirye bati omusaiza oyo yabbaireku mwofu n’alama-bulami, paka owebatumisirye okweta ababyairebe.

19 Kale ababyairebe owebatuukire, omoiza oku beekubbemberi n'ababuulya ati, "Onu mutaane waanywe? Niiye onu ogumukoba muti mwamubyaire nga mwofu? Kiiza kitya okubba nti atyanu ayezya okubona?"

20 Awo ababyaire b'omusaiza nago ni bairamu bati, "Tumaite tuti oyo mutaane waiswe, era tumaite tuti twamubyaire nga mwofu.

21 Neye titumaite owebyabbaire kaisi atyanu n'abba ng'ayezya okubona, era titumaiteku eyamulamirye amaiso. Onyere ngoyo muntu mukulu, mumubuulye, iye onyere yeetumulira."

22 Cooka ababyaire b'omusaiza eyabbaire omwofu batumwire batyo lwa kutya beekubbemberi b'aBayudaaya. Ekyo kityo olw'okubba aBayudaaya babbaire bamalire okutegeragana bati buli muntu eyabbutulanga ati oYesu niiye oKurisito ogubasukireku amafuta, bamubbinganga-bubbingi omwikumbaaniro.

23 Era ekyo niikyo ekyagirire ababyaire b'omwofu nago ni bakoba bati, "Onyere ngoyo muntu mukulu, mumubuulye."

24 Kale awo tete omulundi gwokubiri ni beeta omusaiza nago eyabbaireku omwofu, ni bamukoba bati, "Otumule amazima omumaiso ga Kibbumba,† Iswe tumaite tuti omusaiza ogwotumulaku akola ebibbibbi."

25 Iye n'abairamu ati, "Ooba akola ebibbibbi ooba bbe, nze timmaite. Cooka nze ekintu kimo ekimmaiteku nti nabbaire mwofu neye atyanu mbona."

---

† 9:24 9:24 Ooba, *Ogulumalye oKibbumba*.

26 Tete ni bairamu okumubuulya bati, “OYesu niki ekiyakukolere? Era yakulamirye atya amaisogo?”

27 Iye n’abairamu ati, “Mbakobeire ira ni mugaana okuwulisisya. Olwo lwaki tete mutaka okubiwulira? Nywena mutaka kusuuka beegibe?”

28 Awo ni bamuzuma, era ni bakoba bati, “Niiwe omwegi w’omusaiza nago, neye iswe tuli beegi ba Musa.

29 Era iswe tumaite nakusani tuti oKibbumba yatumwire n’oMusa, neye oyo omusaiza iswe titumaite n’egyazwera.‡”

30 Awo iye omusaiza eyabbaireku omwofu n’abairamu ati, “Kinu nga kyewunyisya ino, inywe okukoba muti timumaite omusaiza oyo egyazwera, aate nga nze yandamirye amaiso!

31 Cooka tumaite tuti oKibbumba tairamu okusaba kw’abakola ebibbibbi. Neye airamu kusaba kw’omuntu amuwa ekitiisya, era akola oKibbumba iye ebyataka.

32 Aate mpaawo awulirangaku ati balamirye amaiso ga muntu ogubabyaire nga mwofu.

33 Kale oyo eyandamirye amaiso singa oKibbumba tiniye eyamutumire, tiyandyezyerye okukola ekyo ekiyakolere.”

34 Iye omusaiza oyo oweyakobere atyo aBayudaaya abo nago ni bamukoba bati, “Iwe ogubabyaliire mu kibbikibbi era n’okulira mu kibbikibbi, wena niiwe ogezyaku okutwegesya iswe?” Era ni bamubbinga omwikumbaaniro.

---

‡ 9:29 9:29 Ooba, *Titumaite egyatoola obwezye.*



*Obwofu bw'obwomi bw'omwoyo*

<sup>35</sup> Kale awo oYesu n'awulira ati omusaiza oguyalamirye amaiso bamubbingire omwikumbaaniro. Era oYesu n'ayaba n'amunoonia era n'amubona. Awo oweyaboine omusaiza nago, oYesu n'amubuulya ati, "Oikiririrya omu Mwana wa Muntu?"

<sup>36</sup> Iye n'amwiramumu ati, "Sebo, niye onaanii oyo? Kaade onkobere njezye okumwikiririyamu?"

<sup>37</sup> OYesu n'amukoba ati, "Omalire atyanu okumubona; era dala niye onu atumula na iwe."

<sup>38</sup> Awo iye omusaiza oyo n'amwiramumu ati, "Musengwa, nkwikiririyamu," era n'akoma amazwi okusinza oYesu.

<sup>39</sup> Kale awo oYesu n'akoba ati, "Nze naizire oku kyalo kumanyikisya bantu ebibbibbi byabwe, kaisi ababbaire boofu bayezye okubona, tete ababbaire babona, boofuwale."

<sup>40</sup> Awo aBafalisaayo ababbaire awo okumpi n'oYesu, owebawuliire ng'oYesu atumula atyo, ni bamubuulya bati, "Okoba niki? Ekyokoba swena tuli boofu?"

<sup>41</sup> OYesu n'abakoba ati, "Singa mubbaire boofu, timwandibbaireku omusango gw'ekibbikibbi. Neye atyanu ng'owemukoba muti mubona, musigala n'omusango gw'ekibbikibbi kyanywe."

## 10

*Olugero lw'omuliisya w'entaama*

<sup>1</sup> Awo oYesu n'abakoba ati, "Mbakobera amazima nti omuntu atabita omu mulyango

ng'aingira omu kiraalo ky'entaama, neye ni yeeyazy kungirira\* awandi, oyo abba mwibbi era mukondo.

<sup>2</sup> Iye oyo aingirira omu mulyango niiye omuliisya onyere entaama.

<sup>3</sup> Era omukuumi w'ekiraalo amwigulirawo, n'entaama gitegeera eignonolye iye ng'omuliisya waagyo. Entaamagye agyeta amaliina, era n'agiwuluca e nza.

<sup>4</sup> Owaamala okugiwuluca gyonagyona, agyekubbemberera ni gimusengererya olw'okubba gimaite eignonolye.

<sup>5</sup> Neye tigyalisengereryaku kadi ogugitamaite, wazira gimwirukaku-bwiruki olw'okubba tigmaite eignonolye."

<sup>6</sup> OYesu yatumwire n'abantu ababbaire awo omu lugero lunu, neye tibategeire ekiyabbaire abakoba.

### *OYesu niiye omuliisya w'entaama omusa*

<sup>7</sup> Kale awo oYesu tete n'atumula nabo ati, "Mbakobera amazima nti ninze aali ooti mulyango gw'ekiraalo ky'entaama.

<sup>8</sup> Ibo abandi bonabona abaizire nga nkaali okwiza nga beefananyiriza nze, baibbi era bakondo, neye ng'entaama owegitawulisisya ogugitamaite, abantu bona tibabawulisisirye.

<sup>9</sup> Ninze omulyango, era nabuli muntu yenayena abita mu nze alokoka.† Ibo abo babba ooti ntaama egingira era ni giwuluka okwaba okuliisya.

---

\* **10:1 10:1** Ooba, *Kuniinira*. † **10:9 10:9** Ooba, *Asuna eidembe*.

<sup>10</sup> Iye omwibbi aizirira kwibba, n’okwita, n’okujigirica. Neye nze naizire, kaisi abantu babbe n’obwomi, era babbe nabwo mu bwizulye.”

<sup>11</sup> Era oYesu ni yeeyongera okukoba ati, “Ninze omuliisya w’entaama omusa, iye oyo awaayo obwomibwe olw’entaamagye.

<sup>12</sup> Cooka iye omupakasi, iye tabba ooti muliisya onyere entaama. Era owaabona omusege nga gwiza, iye alekaawo-buleki entaama ni yeirukirawo. Kale awo omusege gwiza ni gulumba entaama, ni gukwataku omoiza waaku era n’egindi ni gisalaanika.

<sup>13</sup> Iye yeirukirawo olw’okubba iye mupakasi era entaama tagirumirwa.

<sup>14</sup> “Neye nze ndi muliisya w’entaama omusa. Nze mmaite entaama gyange era gyona gimmaite.

<sup>15</sup> Ekikoba nti, ng’oBbaabba owammaite ati ndi mwanawe, zena ntyo mmumaite nti niye oBbaabba, era mpaayo obwomi bwange oku lw’entaama gyange.

<sup>16</sup> Cooka ndi n’entaama egindi egitali gy’omu kiraalo kinu. Nteekwa gyona okugireeta. Era gyona gyaliwulira eigono lyange, era walibbaawo ekiraalo kimo n’omuliisya moiza.

<sup>17</sup> Era ekigira oBbaabba n’abba antaka, niikyo nti nze naliwaayo obwomi bwange ni banjita oku lw’entaama gyange kaisi tete ni nzuukira.

<sup>18</sup> Neye mpaawo aali n’obwezye okunjita, wazira nze onyere naliwaayo-buwi obwomi bwange. Ndi n’obwezye okubuwaayo, era

n'oluzwanyuma tete okubweirirya. Era ekyo niikyo oBbaabba ekiyandagiire okukola.”

<sup>19</sup> Awo, olw'ebibono ebyo tete abeekubbe-  
mberi b'aBayudaaya ni bagabukanamu omu  
nseega.

<sup>20</sup> Era abakira obungi kwibo ni bakoba bati,  
“Oyo aliku omuzimu, era agwire eiralu, lwaki  
mumuwulisisya?”

<sup>21</sup> Cooka ibo abandi nga bakoba bati, “Ebyo  
tiniibyo ebibono by'omuntu aliku omuzimu.  
Aale omuzimu gwona gwezya okulamyama  
g'omwofu?”

*Obutaikirirya*  
*b'aBayudaaya*

*bw'abeekubbemeri*

<sup>22</sup> Awo ng'ebyo biwoire, omu Yerusaalemi, ni  
wabbaawo oMukolo ogw'oKuwonga eYeekaalu,  
era bwabbaire bwire bwa buwolondoki.

<sup>23</sup> Era oYesu yabbaire atambulatabwala omu  
luuga lw'eYeekaalu, omu kigango ekibeetanga  
bati pooci ya kabaka oSulemaani.

<sup>24</sup> Awo aBayudaaya abamo ni bamwerugu-  
ulirirya, ni bamubuulya bati, “Walituuca di  
okutuleka omu kubuusabuusa? Otukobere  
lwatu obanga niuwe okurisito ogubasukireku  
amafuta.”

<sup>25</sup> OYesu n'abairamu ati, “Nabakobeire eira,  
neye timwaikiriirye. Obukakafu bw'ekyo  
ekyendi niibyo ebyewunyo ebyenkola omu  
bwezye bwa Bbaabba.

<sup>26</sup> Neye inywe timunjikirirya olw'okubba tim-  
uli bange.

<sup>27</sup> Ng'entaama owewiwulisisya eigono  
ly'omuliisya waagyo, abantu ibo abange bona

niiye owebawulisisya ebibono byange. Nze abo nago mbamaite, era bansengererya.

<sup>28</sup> Abo mbawa obwomi obutawaawo, era tibali-jigirika naire. Era mpaawo ayezya okubannyag-ulaku omu ngalo.

<sup>29</sup> OBbaabba eyabampaire, iye akira bonabona obwezye, kale mpaawo ayezya okubanyagula omu ngalo gya Bbaabba.

<sup>30</sup> Ekyo kityo olw'okubba nze n'oBbaabba tuli kimo."

<sup>31</sup> Awo abeekubbemberi b'aBayudaaya tete ni bakwata amabbaale okutaka okwita oYesu.

<sup>32</sup> Neye iye n'abakoba ati, "Muboine ebyewunyo bingi ebinkolere oBbaabba ebiyankobere okukola. Olwo kiri yaina kwebyo ekimusinziriraku okutaka okunkubba amabbaale?"

<sup>33</sup> Ibo ni bamwiramu bati, "Mpaawo kwebyo ekitusinziriraku okutaka okukukubba amabbaale, neye lwa kuzumirira Kibbumba olw'okubba iwe omuntu-obuntu, weeyeta okubba Kibbumba."

<sup>34</sup> OYesu n'abairamu ati, "Tibakiwandiikire omu Mateeka gaanywe bati oKibbumba yakobere ati, 'Muli bakibbumba.'

<sup>35</sup> Era mumaite muti eBiwandiike tibayezya okubivunawo. Kale obanga abantu abasunire obukwenda bwa Kibbumba, yabeetere 'bakib-bumba,'

<sup>36</sup> kaisi leero oodi iye oBbaabba oguyatuk-wiryeye era n'amutuma n'oku kyalo? Aale inywe lwaki munvunaana olw'ekizumi, nze

olw'okubba nkobere nti, 'Ndi Mwana wa Kibumbaba?'

<sup>37</sup> Mwanningaine lw'okutakola Bbaabba ebyakola.

<sup>38</sup> Neye owembikola, newankubbaire mungaana, aale mwikiriryeku ebyamagero, kaisi mumanye era mutegeere muti oBbaabba ali n'enkolagana na nze era zena ndi n'enkolagana n'oBbaabba."

<sup>39</sup> Era awo ni bagezyaku tete okumukwata, neye n'abawunuka.

<sup>40</sup> Awo, oluzwanyuma oYesu n'asalamu omwiga oYoludaani n'akanga omu kifo oYokaana egiyabbaireku omu naku gy'enyumaku ng'abatiza. Nabbaaku eeyo,

<sup>41</sup> era abantu bangi ni baabanga e gyali, nga bakoba bati, "Waire oYokaana tiyakolereku akamanyiciryo k'ekywunyo, neye byonabyona ebiyatumwire oku musaiza onu, by'amazima."

<sup>42</sup> Era omu kifo ekyo bangi ni bamwikiririryamu.

## 11

### *Okufa kwa Lazaalo*

<sup>1</sup> Lumo omusaiza ogubeeta oLazaalo, ow'oku kyalo ky'e Bbesaniya, yabbaire mulwaire. Era aboonyokobe, oMalyamu n'oMaliza bona babbaire batyami b'oku kyalo ekyo.

<sup>2</sup> OMalyamu oyo, omwonyoko wa Lazaalo eyabbaire omulwaire niye onyere oyo oluzwanyuma eyasiigire oMusengwa amafuta

agakaloosa oku bigere, era n'abisiimuula n'enziiri gy'okumutwegwe.

<sup>3</sup> Kale abakali abo abaganda, ni baweererya oYesu obukwenda bati, "Musengwa, omukaagwawo gwotaka eino mulwaire."

<sup>4</sup> Neye oYesu oweyakiwuliire, n'akoba ati, "Obulwaire obwo tibwamuzweremu kufa kadi. Wazira kigendereire kugulumalya Kibbumba, era kaisi oMwana wa Kibbumba bamugulumalye okubita mwekyo."

<sup>5</sup> Kiri nti oYesu yabbaire ataka ino oMaliza n'omugandawe n'oLazaalo.

<sup>6</sup> Neye aate oweyawuliire ati oLazaalo mulwaire, tete n'asigalayo egiyabbaire enaku egindi ibiri.

<sup>7</sup> Oluzwanyuma n'akoba abeegibe ati, "Tukange e Buyudaaya."

<sup>8</sup> Neye abeegibe ni bamukoba bati, "Musesya, eizuuli bunu aBayudaaya babbaire bataka okukukubba amabbaale, tete eeyo gyotaka okukanga?"

<sup>9</sup> OYesu n'abairamu ati, "Esaawa egy'omusana tigibba ikumi na ibiri? Iye omuntu atambula omusana tiyeesitaala olw'okubba abba atambulira mu kitangaala ekyaka oku kyalo kunu.

<sup>10</sup> Neye omuntu atambula obwire, niye eyesitaala olw'okubba abba adamba ekitangaala mwiye."

<sup>11</sup> Awo oweyamalire okutumula ebyo, n'abakobera ati, "Omukaagwa waiswe oLazaalo agonere, neye njabayo okumulamuca."

12 Abeegi ni bamukoba bati, “Musengwa, abba agonere, yalamuka.”

13 Cooka oYesu iye yabbaire atumula ku kufa kwa Lazaalo, neye abeegibe ni baseega bati ategeeza kugona ndoolo.

14 Kale awo n’abakobera lwatu ati, “OLazaalo afire,

15 era okulwanywe nsangaire olw’okubba timbaireyo, kaisi olwo mwezye okunjikiririryamu. Aale atyanu twabeyo e gyali.”

16 Awo oTomasi ogubeeta “oMulongo,” n’akoba abeegi abainaye ati, “Swena oleke twabe tufeere aamo n’oMusengwa.”

### *Iye azuukiza era agaba obwomi*

17 OYesu oweyabbaire yatira okutuuka e Bbesaniya, n’amanyica ati oLazaalo amalire enaku ina omu magombe.

18 E Bbesaniya kyabbaire kumpi n’e Yerusaalemi, era wabbairewo ekiromita ooti isatu.

19 Era aBayudaaya bangi okuzwa e Yerusaalemi, babbaire baabire okubona oMaliza n’oMalyamu olw’okufirwa omwonyoko waabwe.

20 Awo oMaliza oweyawuliire ati oYesu ali kwabayo, n’ayaba okumwaniriza, neye oMalyamu iye n’asigala ika.

21 OMaliza oweyasangaine oYesu, n’akoba oYesu ati, “Musengwa aale singa wabbairewo, omwonyoko wange tiyankafiire!

22 Neye mmaite nti atyanu, buli ekiwasaba oKibbumba, yakukolera.”



23 OYesu n'amukoba ati, "OMwonyokowo ayaba okuzuukira."

24 OMaliza n'amwiramumu ati, "Mmaite nti yalizuukira omu kuzuukira okw'olunaku olw'enkomerero."

25 OYesu n'amukoba ati, "Ninze azuukiza, era agaba obwomi obutawaawo. Buli anjikiririyamu, n'owaafa, tete yalibba mwomi.

26 Era buli muntu omwomi era anjikiririyamu, tiyalifa emirembe n'emirembe. Ekyo okiikirirya?"

27 Iye n'amwiramumu ati, "Niikyo Musengwa, njikirirya nti niiwe oKurisito oMwana wa Kibumbumba, oguyasukireku amafuta. Era niiwe oyo eyabbaire n'okwiza oku kyalo."

### *OYesu akunga amaliga*

28 Era oMaliza oweyamalire okutumula ebyo, n'akanga e ika, n'airya omugandawe oMalyamu oku mbale, n'amukoba kyama ati, "OMusomesya aizire, era akubuulya."

29 OMaliamu oweyawuliire ekyo, n'asetuka mangu, n'ayaba okwaniriza oYesu.

30 Awo oYesu yabbaire akaali okwingira omu kitundu ekyo, neye ng'akaali ali mu kitundu oMaliza ekiyamwajiiryemu.

31 Awo aBayudaaya ababbaire n'oMalyamu omu nyumba nga baizire okubabona, owebaboine ng'asetukire mangu n'awuluka, ni bamusenjaaku. Babbaire baseega bati demba n'abba ng'ayaba ku magombe kukunga.

32 Awo oMalyamu oweyatuukireyo, era n'abona oYesu, n'akoma amazwi okumpi

n'ebigerebye, n'amukoba ati, "Musengwa, aale singa wabbairewo, omwonyoko wange tiyankafiire!"

<sup>33</sup> OYesu oweyaboine oMalyamu ng'akunga, n'aBayudaaya ababbairi baabire n'oMalyamu bona nga bakunga, n'alumwa omu mwoyogwe, era ni kimuteganya ino.

<sup>34</sup> Awo n'ababuulya ati, "Mwamuliikire yaina?" Ni bamukoba bati, "Musengwa, oize twabeyo obone."

<sup>35</sup> OYesu n'akunga.

<sup>36</sup> Awo aBayudaaya ni bakoba bati, "Mubone ng'owaabbairi amutaka!"

<sup>37</sup> Neye abamo kwibo ni bakoba bati, "Onu eyalamirye amaiso g'omusaiza omwofu, tiyandibbairiku n'ekyakola oLazaalo nandi nafa?"

### *OYesu azuukiza oLazaalo*

<sup>38</sup> Awo oYesu tete n'airamu okulumwa omu mwoyogwe, n'atuuka oku magombe ga Lazaalo. Era gabbaire magombe ag'empuku, nga baigairewo omulyango n'eibbaale.

<sup>39</sup> OYesu n'akoba ati, "Mutoolewo eibbaale." OMaliza omwonyoko w'omufu, n'akoba oYesu ati, "Neye, Musengwa, atyanu afunya olw'okubba amaliremu enaku ina!"

<sup>40</sup> Awo oYesu n'amukoba ati, "Tinkukobere nti owewaikirirya, wabona ekitiisya kya Kibumba?"

<sup>41</sup> Kale ni batoolawo eibbaale. OYesu n'alingerira omwigulu era n'akoba ati, "Bbaabba, nkwebalya olw'okubba ompuliire.

42 Nze mmaite nti ompulira bulijo, neye ntumwire ekyo olw'okugasa abantu abeemereire aanu, kaisi bayezye okwikirirya bati wantumire.”

43 Oweyamalire okutumula ebyo, n'ayeta n'eigono ery'amaani ati, “Lazaalo, owuluke!”

44 Era eyabbaire omufu nago n'azwayo ng'engoye egibeeta lineni, gikaali mbiringe oku bigerebye n'amangaloge, era nga n'ekiwero kikaali kisibe omumaisoge.

OYesu n'abakoba ati, “Mumusindibuleku engoye egyo, era mumuleke atambule.”

*Olukwe lw'okwita oYesu*

*(Mat 26:1-5; Mak 14:1-2; Luk 22:1-2)*

45 N'olwekyo bangi oku Bayudaaya ababbaire baabire okubona oMalyamu, era ni babona oYesu ekiyakorere, ni bamwikiririyamu.

46 Neye abamo kwibo ni baaba giri Bafalisaayo, era ni babakobera oYesu ekiyakorere.

47 Kale abakabona abakulu n'aBafalisaayo ni batyamisya oLukiiko oLufugi olw'aBayudaaya, ni beebuulya bati, “Tukole tutya? Omusaiza ngonu ali kukolanga obumanyiciryo bw'ebyewunyo bungu.

48 Singa owetumuleka ng'akola ebintu ebyo, abantu bonabona baaba kumwikiririyamu. Era n'aBalooma baliiza ni bajigirica eYeekaalu yaiswe n'eigwanga lyaiswe!”

49 Awo omoiza kwibo, eriina bati Kayaafa, eyabbaire okabona akira obukulu omu mwanka ogwo, n'atumula ino ati, “Inywe mpaawo kimutegeera oku biri kubbangawo!

50 Timumaite muti kibagasa omusaiza omoiza okufeererera abantu, okukiraku eigwanga eribbeereri okujigirika?”

51 Ekyo tiyakitumwire kululwe, wazira nga iye okabona akira obukulu omu mwanka ogwo, yawaire bunaabbi ati oYesu wakufeererera eigwanga ly’aBayudaaya.

52 Era nga tiwakufeererera Bayudaaya bonkani, neye n’abalondemu ba Kibbumba abandi aBatali Bayudaaya abali omu byalo ebindi, okubairya aamo babbe kimo.

53 Kale okuzwa oku lunaku olwo abeekubbe- mberi b’aBayudaaya ni basala olukwe okwita oYesu.

54 N’olwekyo oYesu n’alekeraawo okutambu- lira omu Bayudaaya omu lwatu. Neye n’azwayo, n’ayaba mu kifo ekiriraine eidungu oku kyalo ekibeeta Efulaimu, n’abba eeyo n’abeegibe.

55 Awo oMukolo ogw’aBayudaaya ogw’oKutambukirya owegwabbairre gwatira okutuuka, abantu bangi ni bazwa omu byalo, ni baaba e Yerusaalemi. Baabire kukola mukolo gwabwe ogw’okwetukulya, ng’oMukolo ogw’oKutambukirya gukaali okutuuka.

56 Kale eeyo ni babba omukunoonia oYesu. Era owebabbairre nga beemereire omu luuga lw’eYeekaalu, ni beebuulyangana bati, “Museega mutya? Tiyaizeku oku Mukolo naire?”

57 Ekyo kyabbairre kityo olw’okubba abak- abona abakulu n’aBafalisaayo babbairre balagi- ire bati singa wabbaawo amanyica oYesu e gyali, abakobere kaisi bayezye okumukwata.

## 12

*OYesu bamusukaku amafuta e Bbesaniya  
(Mat 26:6-13; Mak 14:3-9)*

<sup>1</sup> Owewabbaire nga wabulayo enaku mukaaga, oMukolo ogw'oKutambukirya gutuuke, oYesu n'atuuka oku kyalo ky'e Bbesaniya. OLazaalo yabbaire mutyami w'oku kyalo okwo era niye oyo oYesu oguyazuukizire.

<sup>2</sup> Kale eeyo oYesu ni bamutegekera ekyeigulo, era oMaliza n'abainula. Era oLazaalo yabbaire moiza kwabo abaliire oku menza n'oYesu.

<sup>3</sup> Kale awo oMalyamu n'akwata ecupa\* erimu amafuta amakengeize ag'akaloosa, era ag'ebbeeyi eino agebeeta naludo. Awo n'agasuka oku bigere bya Yesu, era n'abisiimuula n'enziiri gy'okumutwegwe. Era enyumba n'eizula akaloosa ak'amafula ago.

<sup>4</sup> Neye oYuda oIsikalyoti, era omoiza oku beegi ba Yesu, eyabbaire ayaba okumulyamu olukwe, n'akoba ababbairewo ati,

<sup>5</sup> "Kale lwaki amafuta ago tibagatundiremu edinaali 300, era empiiya egyo ni bagigabira abadoobi?"

<sup>6</sup> OYuda yatumwire ekyo tirwakubba nti yabbaire alumirwa abadoobi, neye olw'okubba yabbaire mwibbi. Era ng'owekyabbaire kiti niye eyabbaire omuwanika waabwe, iye yaibbangaku egimo.

<sup>7</sup> Awo oYesu n'airamu ati, "OMalyamu muleke olw'okubba kyabbaire kigenderere kiti

---

\* **12:3 12:3 Cupa** omu Luyonaani kiri, *Litera*. **12:3 12:3** Luk 7:37-38

yabbaire ali n’okubisa amafuta ago kugakolesya ku lunaku olubalindiikiraku.

<sup>8</sup> Ekyyo kityo olw’okubba abadoobi ibo baababanga na inywe bulijo, neye nze tinaabbe na inywe okumala ekiseera ekinene.”

*Olukwe olw’okwita oLazaalo*

<sup>9</sup> Awo ekiyindi kinene eky’abayudaaya, ni kitegeera kiti oYesu ali e Bbesaniya. Kale ni baabayoy, tirwakubona Yesu kyonkani, neye n’okubona oLazaalo, oYesu oguyazuukizire.

<sup>10</sup> Kale awo abakabona abakulu ni basala amalabuki okwita oLazaalo yena.

<sup>11</sup> Ekyyo kyabbaire kityo olw’okubba okulwa Lazaalo, abayudaaya bangi bazwanga oku bakabona abakulu ni baaba egiri oYesu, era ni bamwikiririryamu.

*OYesu bamwaniriza omu kitiisya eky’amaani (Mat 21:1-11; Mak 11:1-11; Luk 19:28-40)*

<sup>12</sup> Oku lunaku olwairireku, ekiziima kinene eky’abantu ababbaire baabire e Yerusaalemi oku Mukolo ogw’okutambukirya, ni bawulira bati oYesu ali kwabayo.

<sup>13</sup> Awo ni bakwata ensansa egitali nkujuulye, era ni baaba okumwaniriza nga webaceera bati, “Tuwuuje oMusengwa iye oKibbumba! W’enkabi iye oyo aiza omu liina lya Musengwa iye oKibbumba!

Tumuwuuje iye oyo oKabaka wa Isirairi.”

<sup>14</sup> Awo oYesu n’asuna ompunda omutomuto, n’atyamaku okutuukirirya eKiwandiike ekiti,

<sup>15</sup> “Inywe abantu b’e Sayuuni timwatya.

Aale mubone oKabaka waanywe aiza,  
ng'atyaimbe oku mpunda omutomuto.”

<sup>16</sup> Omu kiseera ekyo abeegibe tibategeire ebintu ebyo, neye oKibbumba oweyamalire okugulumalya oYesu ng'amuzuukiza, kaisi ni beebukirya ng'ebyo byabbaire bityo ng'owekiri omu Biwandiike by'abanaabbi.

<sup>17</sup> Ekiziima ky'abantu ekyabbairewo ng'oYesu ayeta oLazaalo okuzwa omu magombe era n'amuzuukiza, ni beeyongera okukobera abantu abandi ebyabbairewo.

<sup>18</sup> N'olwekyo abantu bangi, olw'okubba babbaire bawuliire bati yabbaire akolere akamanyiciryo k'ekyewunyo kanu, ni baabayokumusan-gaana

<sup>19</sup> Kale aBafalisaayo ni bakobangana bati, “Kimaneye kusani nti mpaawo kitwezya okukola. Aale mubone buli muntu amusengererya!”

*ABayonaani abataka okutumula n'oYesu*

<sup>20</sup> Atyanu abamo oku Bayonaani babbaire bamo oku bantu abaabire e Yerusaalemi okusinza oKibbumba oku Mukolo ogw'oKutambukirya.

<sup>21</sup> Kale aBayonaani abo owebatuukire eeyo ni baaba egiri oFiripo ow'oku kyalo ky'e Bbesusaida eky'omwitwale ly'e Galiraaya, ni bamusaba bati, “Sebo tutaka okutumulaku n'oYesu.”

<sup>22</sup> Awo oFiripo n'ayaba n'akoba Andereya kaisi bonabona ni baaba okukobera oYesu.

<sup>23</sup> Iye oYesu n'abairamu ati, “Ekiseera kituukire oKibbumba okugulumalya oMwana wa Muntu.

24 Era mbakobera amazima nti onsigu owaatagwa omwitakali era ni bamuliika, asigala denge. Neye owebamuliika amera n'abala empeke nyingi.

25 Buli agezyaku okulamy obwomibwe okululwe, yalibufiirwa, neye buli acaawa obwomibwe okulwange ng'ali oku kyalo kunu, yalisuna obwomi obutawaawo.

26 Era oyo iye ampeererya, atekwa okubba aikiriirye okugumira nze ebinjaba okubitamu, kaisi olwo eginaaba eeyo omwigulu yena bayezye okumutucaayo. Kale oBbaabba yaliwa ekitiisya iye oyo ampeererya.”

*OYesu atumula oku kufaakwe*

27 Awo oYesu ni yeeyongera ati, “Atyanu omwoyo gwange gweraliikiriire, era timmaite n'ekyokukoba. Nkobe nti, 'Bbaabba toganya akaseera akagosi ako ak'okugada n'okufa okuntuukaku?' Bbe, olw'okubba ekyandetere niikyo nze omu kaseera kanu okubita omu kugada!

28 Aale Bbaabba ogulumalye eriinalyo.” Awo eigono ni lizwa omwigulu erikoba liti, “Naligulumairye era nalirigulumalya tete.”

29 Ikyo ekiziima ky'abantu ekyabbaire kye-mereire awo owebawuliire, abamo ni bakoba bati, “Laadu niyo ebbwatuka!” Abandi ni bakoba bati, “Omalaika atumwire naye.”

30 Awo oYesu n'abakoba ati, “Eigono eeryo erimuwuliire tiriizire kugasa ninze, wazira kugasa niinywe.



<sup>31</sup> Era atyanu oKibbumba ayaba okusalira ekyalo omusango. N'omu kiseera kinu iye oSitaani omufugi w'ekyalo kinu, oKibbumba ayaba okumuwambaku obufugi.

<sup>32</sup> Neye nze owebalinjanika oku musalabba, nalikuusa abantu bonabona ni babba bange."

<sup>33</sup> Ekyo yakitumwire, ng'ategeeza enfa egiyabaire ayaba okufaamu.

<sup>34</sup> Awo ekiziima ky'abantu ni kiceera nga bakoba bati, "Iswe tumaite tuti eBiwandiike bikoba biti oKurisito ogubasukireku amafuta wa kubbaawo emirembe n'emirembe. Olwo tete iwe okoba otya oti oMwana wa Muntu bateekwa okumwanika oku musalabba? Iwe otumula ku Mwana wa Muntu aliina oyo?"

<sup>35</sup> Awo oYesu n'abakoba ati, "Mwaba okweyongera okubbaaku n'ekitangaala ekiseera kitono. Kale mutambule nga kikaali kiriwo, ng'endikiirya ekaali okubazingiza olw'okubba atambulira omu ndikiirya tabona e gyayaba.

<sup>36</sup> Kale mwikirirye omu kitangaala nga kikaali kiriwo, kaisi mwezye okubba bantu b'ekitangaala." OYesu oweyamalire okutumula ebyo n'azwawo era ni yebeebisaku.

### *ABayudaaya beeyongera n'obutaikirirya*

<sup>37</sup> Awo oYesu n'oweyamalire okukola obumanyiciryo bw'ebyewunyo obwo bwonabwona nga babona, era aBayudaaya tibamwikiririyemu.

<sup>38</sup> Ekyo kyabaire kityo lw'okutuukirirya kibono kya Isaaya onaabbi, ekiti:

“Musengwa Kibbumba, naani aikiriirye obukwenda bwaiswe era naani ogubabiikuliire obwezye bwa Musengwa?”

<sup>39</sup> Ekyo niikyo ekyagirire ni batezya okwikirirya, olw’okubba oIsaaya era yakobeire awandi ati:

<sup>40</sup> “OKibbumba yaboofuwairye era n’abakakanyalya emyoyo, kale tibayezya kadi kubona n’amaiso gaabwe ag’omwoyo, waire kutegeera, waire kucuuka ni baira egyendi omu myoyo gyabwe, era ni mbalokola.”

<sup>41</sup> Ebyo oIsaaya yabitumwire olw’okubba yaboine ekitiisya kya Yesu, era oIsaaya n’amutumulaku.

<sup>42</sup> Cooka era omu kiseera ekinyere ekyo bangi oku beekubbemberi b’aBayudaaya bamwikiririyemu. Neye olw’okutya aBafalisaayo, tibakibbutwire nga baseega bati demba ni bababbinga omwikumbaaniro.

<sup>43</sup> Ekyo kityo olw’okubba batakire bantu okubawuuja okukiraku oKibbumba iye okubawuuja.

<sup>44</sup> Awo oYesu n’alangirira ati, “Omuntu owanjikiririyamu tabba anjikiririyamu ninze zenkani, wazira abba aikiririrya n’omu Kibbumba eyantumire.

<sup>45</sup> Era omuntu oyo owambonaku, abba ooti aboine Kibbumba eyantumire.

<sup>46</sup> Nze naizire oku kyalo ng'ekitangaala, kaisi buli anjikiririryamu, tiyasigala omu ndikiirya.”

<sup>47</sup> Awo oYesu ni yeeyongera ati, “Iye omuntu awulira ebibono byange kaisi n’atabikwata, timmusalira omusango. Ekyo kityo olw’okubba tinaizire kusalira bantu misango, wazira kubalokola.

<sup>48</sup> Neye iye oyo angaana era ataikirirya ebibono byange, oKibbumba yalimusingisya omusango oku lunaku lw’enkomerero ng’asinzirira ku bibono ebyo ebinatumwire.

<sup>49</sup> Ekyo kityo olw’okubba tinabitumulanga kulwange, neye oBbaabba eyantumire niye eyandagiire ebyokutumula, n’engeri y’okubitumulamu.

<sup>50</sup> Era mmaite nti omukugondera ekiragirokye kizweramu omuntu okusuna obwomi obutawaawo. Kale buli ekintumula kibba kinanyerenyeere kidi oBbaabba ekiyankobere okutumula.”

## 13

### *OYesu anaabya abeegibe ebigere*

<sup>1</sup> Awo eizo waaku lwabbaire lwabba lunaku lw’oMukolo ogw’oKutambukirya. Iye oYesu yategeire ati ekiseerakye ekyokuzwa oku kyalo kunu okukanga egiri oIteeye kituukire. Neye ibo abeegibe babbaire baaba okusigala oku kyalo kunu. Era oYesu yabbaire ataka ino abeegibe kale awo n’abalaga ng’owabataka omu bwizulye.

<sup>2</sup> Kale omu kiseera oYesu n’abeegibe ekibabbereire aamo oku kyeigulo, oSitaani yabbaire amalire okuteeka omu mwoyo gwa Yuda

oIsikalyoti omutaane wa Simooni ekiseego ky'okulyamu oYesu olukwe.

<sup>3</sup> Neye iye oYesu yabbaire akimaite kusani ati oTeeye yamuwaire obwezye oku bintu byonabyona. Era yabbaire akimaite ati yazwire giri Kibbumba, era ati yatira okukanga egiri oKibbumba.

<sup>4</sup> Kale awo n'asetuka n'azwa oku kiinulo, ni yeetoolamu ekizibaawokye, kaisi n'akwata etawulo ni yeesiba omu nkende.

<sup>5</sup> Oluzwanyuma lw'ekyo n'asuka amaizi omu kalaayi kaisi n'atandiika okunaabya abeegibe ebigere. Yabinaabyanga neenu wabisiimuula n'etawulo egiyabbaire yeesibire.

<sup>6</sup> Awo n'atuuka oku Simooni oPeetero, kaisi iye n'amukoba ati, "Musengwa, oyaba kunnaabya bigere?"

<sup>7</sup> OYesu n'amwiramumu ati, "Iwe totegeera ekindi kukola esaawa eenu, neye oluzwanyuma walikitegeera."

<sup>8</sup> Awo oPeetero n'amwiramumu ati, "Musengwa nze tinaliikiriryaku iwe okunnaabya ebigere." Cooka oYesu n'amwiramumu ati, "Owentakunaabya ebigere, obba toli kimo na nze."

<sup>9</sup> Awo oSimooni Peetero n'amukoba ati, "Musengwa, aale nga kityo tiwannaabyaku bigere byonkani, neye onnaabye paka n'amangalo n'omutwe gwona!"

<sup>10</sup> Kale oYesu n'amukoba ati, "Iye omuntu owaabba ng'abbaire amalire okunaaba omubiri gwonagwona, iye oyo abba yeetaaga kunaabaku

bigere byonkani. Igwo omubiri gubba gutukwire. Aate era inywe muli batukulye, okutoolaku omoiza kwinywe.”

<sup>11</sup> Yakobere atyo olw’okubba iye yabbaire amaite ayaba okumulyamu olukwe, era niikyo ekyagirire n’akoba ati batukulye okutoolaku omoiza kwibo.

<sup>12</sup> Kale oYesu oweyamalire okunaabya abeegibe ebigere, tete n’azwala ekizibaawokye era n’akanga n’atyama oku kiinulo. Awo n’ababuulya ati, “Mutegeera amakulu g’ekyo ekinkolere?”

<sup>13</sup> Inywe munjeta ‘Musomesya’ era muti, ‘Musengwa,’ era ekimutumula kituuce olw’okubba ekyo niikyo ekyendi.

<sup>14</sup> Aale atyanu nze, oMusengwa waanywe era oMusomesya waanywe ng’owemmalire okubanaabya ebigere, na inywe nywena muli n’okunaabyangananga ebigere.

<sup>15</sup> Nze mbateekeirewo ekyokuboneraku ekimuli n’okukola ng’owembakoleire.

<sup>16</sup> Mbakobera amazima nti mpaawo mugalama abba w’ekitiisya okukiraku omusengwawe, waire mukwenda tabba w’ekitiisya okukiraku amutumire.

<sup>17</sup> Atyanu ng’owemumaite ebintu ebyo, mwabba b’enkabi owemwabikolanga.”

*OYesu alagula oku kumulyamu olukwe*

*(Mat 26:20-25; Mak 14:17-21; Luk 22:21-23)*

<sup>18</sup> Awo oYesu ni yeeyongera ati, “Tindi kutumulanga ku niinywe nywenanywena, nze mmaite

abantu abenalonderemu, ikyo ekibali. Neye ekyo kyokutuukirirya Kiwandiike, ekikoba kiti, 'Oyo ogundya naye ayaba okundyamu olukwe.'

<sup>19</sup> Nze ndi kubakobera oku kintu ekyo atyanu nga kikaali okubbaawo, kaisi olwo owekyalimala okubbaawo, mwezye okwikirirya muti ninze oyo ng'owenetumulaku.

<sup>20</sup> Era mbakobera amazima nti asangaalira nabuli oguntuma, abba asangaaliire ninze, era nabuli ansangaalira, abba asangaaliire Kibumba oyo eyantumire."

<sup>21</sup> Kale awo oYesu oweyamalire okutumula ebyo, ni yeeraliikirira ino omu mwoyogwe, n'abbutula ati, "Mbakobera amazima, omoiza kwinywe ayaba okundyamu olukwe."

<sup>22</sup> Awo abeegibe ni balolanganaku, neye ni bibasobera olw'okutamanya oguyabbaire atumulaku.

<sup>23</sup> Iye omoiza oku beegi, oYesu oguyabbaire ataka eino, yabbaire atyaime kumpi n'oYesu.

<sup>24</sup> Kaisi awo oSimooni Peetero n'agererya omwegi oyo nago ng'amukoba ati, "Obuulye oYesu atukobere ogwatumulaku."

<sup>25</sup> Kale awo omwegi oyo nago eyabbaire atyaime okumpi n'oYesu, n'amweigikaku omu kifubba katono kaisi n'amubuulya ati, "Musengwa, naani oyo ogwotumulaku?"

<sup>26</sup> Iye oYesu n'amwiramu ati, "Niiye oyo ogunaawa ekimegero kinu ekinaabba nkozerye omu syodo." Era oYesu n'akozya ekimegero,

kaisi n'akiwa oYuda oIsikalyoti omutaane wa Simooni.

<sup>27</sup> Era oYuda oweyamalire okulya ekimegero ekyo, amangu ago oSitaani n'amwingiramu.

Awo oYesu n'amukoba ati, "Ekiwatira okukola, okikole mangu!"

<sup>28</sup> Neye ku bonabona ababbaire awo oku kiinulo, mpaawo kadi moiza eyategeire ekyazwireku oYesu n'akoba atyo oYuda.

<sup>29</sup> Neye abamo ni baseega bati oYuda ng'oweyabbaire niye omuwanika, oYesu ayezya okubba amutuma kugula bintu by'oku Mukolo, ooba amukoba kugabiraku badoobi mpiya.

<sup>30</sup> Kale oYuda oweyamalire okulya ekimegero ekyo, amangu ago n'awuluka. Era omu kiseera ekyo omu mwoyogwe mwabbaire mwizwire endikiirya nga n'obwire bwirugaire.

### *Ekiragiro ekiyaaka*

<sup>31</sup> Kale awo oYuda oweyamalire okuwuluka okwaba, awo oYesu n'akoba abeegibe ababbaire basigaire awo ati, "Atyanu oMwana wa Muntu oKibbumba amugulumairye, era okubita omu Mwana nago abantu bagulumairye oKibbumba.

<sup>32</sup> Kaisi obanga oKibbumba bamugulumairye kubita mu niye, era n'oKibbumba yagulumalya oMwana wa Muntu amangu ago.

<sup>33</sup> Baana bange, naabba na inywe akaseera katono. Mwalinnoonia, era nakimo ng'owenakobere aBayudaaya, n'atyanu niikyo ekimbakobera nti, 'Inywe timwezya okutuuka eginjaba.' "

<sup>34</sup> Awo oYesu ni yeeyongera ati, “Cooka mbawa ekiragiyo ekiyaaka nti, mutakanganenge. Nga nze owembataka, mutyo na inywe wemuteekwa okutakangananga.

<sup>35</sup> Singa owemwabbanga n’okutakangananga, awo abantu bonabona bamanyicanga bati muli beegi bange.”

*OYesu alanga ati oPeetero yamwegaana  
(Mat 26:31-35; Mak 14:27-31; Luk 22:31-34)*

<sup>36</sup> Awo oSimooni Peetero n’abuulya oYesu ati, “Musengwa, oli kwaba yaina?”

OYesu n’amwiramumu ati, “Omu kiseera kinu toyeyza okwabayo na nze, neye oluzwanyuma waliizayo.”

<sup>37</sup> Tete oPeetero n’amubuulya ati, “Musengwa, lwaki timpezya okwaba na iwe atyanu? Ndi mugeki okukufeerera.”

<sup>38</sup> Awo oYesu n’amwiramumu ati, “Iwe dala oli mugeki okunfeererera? Nkukobera amazima nti, onkoko yaabba akaali n’okukookoola nga wankuneegaanira emirundi misatu ng’okoba oti tommaite.”

## 14

*Enzira n’obwomi n’amazima*

<sup>1</sup> Awo oYesu n’akoba ati, “Timweraliikiriranga. Inywe mwikiririrye mu Kibumba, era na nze zena munjikiririryemu.

<sup>2</sup> Omu nyumba ya Bbaabba mulimu ebisenge bingi, era njaba okubategekera ekifo. Singa ekyo



tikibbaire kituuce, tinandibakobere nti njabayo okubategekera ekifo.

<sup>3</sup> Era owenalimala okubategekera ekifo, naliira ni mbatwala ni mubbanga na nze kaisi nywena ni mubbanga eeyo eginlibba.

<sup>4</sup> Era mumaite enzira etuuka e ginjaba.”

<sup>5</sup> Awo oTomasi n’amukoba ati, “Musengwa titumaite egyoyaba, kale twamanya tutya enzira eyabayo?”

<sup>6</sup> Awo oYesu n’amwiramumu ati, “Ninze enzira, era ninze amazima, era ninze obwomi. Mpaawo atuuka egiri oBbaabba okutoolaku ng’abitire mu ninze.

<sup>7</sup> Singa nze muntegeera, n’oBbaabba yena mwandimutegeire.\* Era okuzwa olwatyanu muntegeire era muli ng’abamuboneku.”

<sup>8</sup> Awo oFiripo n’amukoba ati, “Musengwa, otulagisye oIteewo era ekyo kyatumala.”

<sup>9</sup> Iye oYesu n’amwiramumu ati, “Kasookeede mba na inywe ekiseera ekyo kyonakyona, Firipo tontegeeranga? Obanga buli muntu ambonaku, abba ng’aboine oku Bbaabba. Tete obba otya okunkoba oti, ‘Otulagisye oIteewo?’

<sup>10</sup> Iwe toikirirya oti nze ndi kintu kimo n’oBbaabba, era n’oBbaabba ali ekintu ekimo na nze? Ebibono ebimbakobera inywe, tibyangekubwange. Neye oBbaabba iye ali ekintu ekimo na nze, niiye akola ng’owaataka ng’abita mwebyo ebinkola n’ebintumula.”

<sup>11</sup> Awo oYesu ni yeeyongera okukoba ati, “Aale mwikirirya ebimbakobera nti nze ndi kintu kimo

---

\* **14:7 14:7** Ooba, Owemubba dala nga muntegeire, oBbaabba yena mwalimutegeera.

n’oBbaabba era n’oBbaabba ali kintu kimo na nze. Aale owemubbanga timwikirirya ebin-tumula, mwikirirye olw’ebywunyo ebinkola waire byonkani.”

<sup>12</sup> Mbakobera amazima nti buli anjikiririyamu, yalikola ebyewunyo ooti biibyo ebinkolanga, era yalikola n’ebikiraku ebyo olw’okubba njaba egiri oBbaabba.

<sup>13</sup> Era buli ekimwasabanga nga mubita omu liina lyange, nakibakoleranga, kaisi oBbaabba bamugulumalye nga babita omu Mwanawe.

<sup>14</sup> Era buli owemwansabanga ekintu kyonaky-ona nga mubita omu liina lyange, nakikolanga.

### *OYesu asuubiza oMwoyo oMutukulye*

<sup>15</sup> Awo oYesu ni yeeyongera okutumula nabo ati, “Owemubbanga muntaka, mwakwatanga ebiragiro byange.

<sup>16</sup> Era nalisaba oBbaabba n’abawa oMubbeeri ogondi, iye etiyalibaleka emirembe n’emirembe.

<sup>17</sup> OMwoyo nago niye amanyikisya abantu amazima agakwata oku Kibbumba. Cooka ibo abataikiririrya omu Kibbumba tibayezya okwikirirya Mwoyo nago olw’okubba tibatutegeera, era tibamumaite. Neye inywe mumumaite olw’okubba abba na inywe, era yatya-manga omu myoyo gyanywe.

<sup>18</sup> Era tinalibalekawo okubba ooti bafuubbi olw’okubba owemwalisuna oMwoyo nago kyal-ibba ooti ninze njirire egimuli.

<sup>19</sup> Omu kiseera kitono kiti, ibo abataikiririrya omu Kibbumba baabbanga tibakaali bambona, neye inywe mwalimbona olw’okubba tete nal-ibba mwomi, era nywena mwalibba boomi.

<sup>20</sup> Era oku lunaku olwo tete olumwalimboneraku nga mmalire okuzuukira mwalitegeera muti nze ndi kintu kimo n'oBbaabba, era muti nywena muli kintu kimo na nze, era tete muti nze ndi kintu kimo na inywe.

<sup>21</sup> Buli awulira ebiragiro byange n'abikwata, oyo niye antaka. Era oBbaabba yatakanga oyo antaka, zena natakanga omuntu oyo, era namubiikuliranga ikyo ekyendi."

<sup>22</sup> Kale awo oYuda, neye nga tiyoodi oIsikalyoti, n'amubuulya ati, "Neye Musengwa, lwaki ogenderera kutubiikulira niiswe tumanye ikyo ekyoli, kaisi nandi n'obiikulira ibo abantu abandi oku kyalo?"

<sup>23</sup> OYesu n'amwiramumu ati, "Omuntu yenayena antaka, yakwatanga ebibono byange ebimukoba. N'olwekyo oBbaabba yamutakanga era nze n'oBbaabba twaizanga egyali ni tubbanga aamo naye.

<sup>24</sup> Iye oyo atantaka, takwata ebibono ebyo aate ng'ebibono nago ebyembakobera tibyangе, wazira bya Bbaabba era eyantumire."

<sup>25</sup> OYesu ni yeeyongera okukoba ati, "Mbakobeire ebyo byonabyona nga nkaali ndi na inywe.

<sup>26</sup> Neye oMubbeeri, iye oMwoyo oMutukulye oyo oBbaabba oguyalituma omu kigere kyange, yalibeegesya byonabyona era yalibeebukirya byonabyona ebimbakobeire.

<sup>27</sup> Aale atyanu mbalekera eidembe, era mbawa eidembe eryange. Iryo erimbawa tiriwaawo, era tiriri ooti liiryo abantu eribasuna oku kyalo.

N’olwekyo timweraliikiriranga era timwatyanga olw’ebyabbangawo.”

<sup>28</sup> Awo oYesu ni yeeyongera ati, “Muwuliire nga mbakohera nti ‘njaba, neye naira egimuli.’ Aale singa mubbaire muntaka, mwandisangaire nze okwaba egiri oBbaabba olw’okubba iye anki-raku ekitiisya.

<sup>29</sup> Ebyo mbibakobeire atyanu nga bikaali okub-baawo, kaisi owebyalimala okubbaawo mwezye okunjikiririryamu.

<sup>30</sup> Cooka tineeyongere okutumula na inywe olw’okubba oSitaani omufugi w’ekyalo kinu aiza okunnumba. Neye abula obwezye kwebyo ebin-tuukaku.

<sup>31</sup> Wazira, ibo abantu abatali ba Kibbumba batekwa okumanya okusinzirira kwebyo ebin-tuukaku bati ntaka oBbaabba. Era bati ndi kukolanga biidi oBbaabba ebiyandagiire.”

Awo n’amaliirirya ati, “Aale atyanu mwize twabe.”

## 15

### *Omuzabbibbu n’amasaga gaagwo*

<sup>1</sup> Awo oYesu n’akoba abeegibe ati, “Ninze ek-itina ky’omuzabbibbu ogunanyerenyeere, kaisi oBbaabba niye omulimi waagwo.

<sup>2</sup> Ansalaku buli isaga erindiku eritaneneka neenu nga waasalira\* lidi erineneka kaisi lyezye okubala ino.

<sup>3</sup> Kale inywe atyanu muli batukulye ooti masaga omulimi agaamalire okusalira

---

\* 15:2 15:2 *Waasalira*, Ooba, *Waayonja*.

olw'okubba mwaikiriirye obukwenda  
obunalaabbire egimuli.

<sup>4</sup> Aale musigale nga muli kintu kimo na nze, era zena nga ndi kintu kimo na inywe. Ekyo kityo olw'okubba mpaawo isaga erineneka okulwalyo. Liri n'okubba ku kitina kaisi ni lineneka. Kale nywena timwezya kukola ebikole oKibbumba ebyabasuubiriramu nga timuli ekintu ekimo na nze.”

<sup>5</sup> Awo ni yeeyongera ati, “Ndi ooti kitina ky'omuzabbibbu, kaisi inywe ni mubba ooti masaga. Kale omuntu owaabba ekintu ekimo na nze kaisi zena ni mba ekintu ekimo naye, akola ebikole ebisa bingi. Iye oyo abba ooti masaga agali oku muzabbibbu agabala ebineneka ebingi. Era anambula obubbeeri bwange mpaawo ekinwezya okukola.

<sup>6</sup> Kale omuntu owaatabba ekintu ekimo na nze, abba ooti isaga eribamuma eedi era ni liwotoka. Era agatyo niigo agebatoola ni bagamuma omu musyo ni gaya.

<sup>7</sup> Neye owemubba ekintu ekimo na nze, era ni musigala nga mukolera oku bibono ebimbakoba, mwezya okusaba kyonakyoona ekimutaka era oKibbumba yakibawanga.

<sup>8</sup> Kale owemukola ebikole ebisa ebingi, oBbaabba bamugulumalya era mubba mweragire muti muli beegi bange.”

<sup>9</sup> Awo oYesu ni yeeyongera okubakoba ati, “Atyo nakimo ng'oBbaabba owantakire, zena niyo engeri egimbatakamu inywe. Mweyongere okubba ekintu ekimo na nze kaisi neyongere okubataka.

<sup>10</sup> Atyanu, singa owemwakwatanga ebimbala-gira, zena neyongeranga okubataka. Era kityo nakimo nga zena owenkwatanga ebyo oBbaabba ebyandagira ni yeeyongera okuntaka.”

<sup>11</sup> Awo oYesu ni yeeyongera ati, “Mbakobeire ebintu ebyo, kaisi olwo mubbe n’eisangaalo eriri ooti lyange erindi nalyo, era mubbe nalyo omu bwizulye.

<sup>12</sup> Era ekiragiyo kyange niikyo kinu ekiti, mutakanganenge, nga nze owenabatakire.

<sup>13</sup> Mpaawo muntu aali n’okutaka okukiraku okw’oyo awaayo obwomibwe olw’abakaagwabe.

<sup>14</sup> Singa musigala nga mukola ebimbalagira mulaga muti muli bakaagwa bange.

<sup>15</sup> Nze tinkaali mbeeta baweererya olw’okubba omuweererya tamanya omusengwawe ebyakola. Wazira mbeeta bakaagwa bange olw’okubba inywe mbakobeire byonabyona oBbaabba ebiyankobeire.

<sup>16</sup> Era tiniinywe omwasalirewo okubba beegi bange, neye ninze enabalonderemu inywe era ni mbateekawo okukolanga ebikole ebisa. Kaisi awo oBbaabba ayezye okubawanga buli ekimusaba nga mubita omu liina lyange.

<sup>17</sup> Era kinu niikyo ekimbalagira nti mutakanganenge.”

*Abantu bacaawa abeegi ba Yesu*

<sup>18</sup> Kale awo oYesu ni yeeyongera okukoba ati, “Singa abantu abataikiririrya omu Kibbumba owebabacaawanga, mwebukiryenge muti basookere kucaawa ninze.

19 Kale singa mubbaire bamo kwibo nago bandibbaire babataka nga inywe abaabwe. Kiri kiti, timuli bamo kwibo wazira inywe nabalonderemu okuzwa omu bantu abo. Ekyo niikyo ekigira abo abanjakanisya ni babacaawa.

20 Aale mwebukirye ebibono ebinabakobeire nti, 'Mpaawo mugalama abba ow'ekitiisya okukiraku omusengwawe.' Owekibba nti nze banjiigaanirye, na inywe nywena balibagadya, era ng'owekiri nti bakwaite okwegesya kwange, n'ebyanywe byona balibikwata.

21 Ibo baaba okubagadyanga olw'okubba inywe muli bange, era olw'okubba tibamaite oyo eyantumire.

22 Aale singa tinaizire ni ntumula nabo, oKibbumba tiyandibbaire abalumiriza olw'ekibbikibbi. Neye atyanu babula kyokuwozyeryaku olw'ekibbikibbi kyabwe.

23 Iye ancaawa acaawa n'oBbaabba yena.

24 Aale singa tibaboine nga nkola ebyamagero ebyo omuntu yenayena ogondi ebyatakolangaku, oKibbumba tiyandibbaire abasalira omusango olw'ekibbikibbi. Neye atyanu baboine ebyamagero ebyo, kaisi era ni basigala nga batucaawa nze n'oBbaabba.

25 Neye ebyo ibyo byokutuukirirya kibawandikire omwIteeka lyabwe bati, 'Bancaawire anambula nsonga.' "

26 Kale oYesu ni yeeyongera ati, "Omubbeerii oweyaliiza oyo ogunalibasindikira ng'azwa egiri oBbaabba, yalikobera abantu ebinkwataku.

Omubbeeri oyo nago yalibba Mwoyo atumula amazima agakwata oku Bbaabba era azwera nakimo egiri oBbaabba.

<sup>27</sup> Era nywena muteekwa okukobera abandi ebinkwataku olw'okubba mubbaire na nze kuzwera nakimo owenatandiikiire okwegesya."

## 16

<sup>1</sup> Awo oYesu ni yeeyongera ati, "Ebyo byonabyona mbibakobeire kaisi timwesiitaala ni muleka okwikirirya kwanywe.

<sup>2</sup> Balibabbinga omu makumbaaniro. Era amazima gali gati, ekiseera kyaba okutuuka nga buli abaita inywe aseega ati omu kukola ekyo aweererya Kibbumba.

<sup>3</sup> Ebyo balibibakola olwaibo okutamanya oBbaabba ekyali, ooba nze ekyendi.

<sup>4</sup> Neye ebyo mbibakobeire, kaisi olwo ekiseera kyabyo owekyalituuka, mwezye okwebukirya muti nabalabwire." Awo oYesu ni yeeyongera okutumula nabo ati, "Omu ntandika y'okwikirirya kwanywe, tinabakobeire oku byokubagadya ebyo olw'okubba nabbaire nkaali ndi na inywe."

### *OMwoyo oMutukulye ebyakola*

<sup>5</sup> "Neye atyanu njaba egiri oyo eyantumire, wazira mpaawo kwinywe ambuulya eginjaba.

<sup>6</sup> Inywe olw'okubba mbakobeire nti njaba okubazwaku, tete emyoyo gyanywe giirire ni giizula nima.

<sup>7</sup> Neye mbakobera amazima nti nze okubazwaku okwaba egiri oBbaabba kibagasa niinywe olw'okubba owentayaba, omubbeeri



oMwoyo oMutukulye tiyaliiza egimuli. Cooka owenjaba, nalimutuma egimuli.

<sup>8</sup> Era Iye oweyaliiza, yalirumiriza abataikiririrya omu Kibbumba ati enseega yaabwe tintuuce oku bikwata oku kibbikibbi n'oku muntuki omutuukirirye. Era yalibalaga n'oku muntu w'engeriki oKibbumba oguyalisingisya omusango.

<sup>9</sup> Era omusango ogwo gwalibba gusinzirira ku kibbikibbi eky'omuntu ekyokutanjikiririryamu.

<sup>10</sup> Era oMwoyo oMutukulye yaliraga ati enseega yaabwe tintuuce oku butuukirirye bwange olw'okubba nkanga egiri oBbaabba eeyo e gimwabba nga timukaali mumbona.

<sup>11</sup> N'okubikwata oku kusala omusango, era byona oMwoyo oMutukulye yalikakasa abantu ng'oKibbumba oweyamalire okusingisya oSitaani omusango. Era oSitaani oyo nago niye omufugi w'abantu abakola ebibbibibi.”

<sup>12</sup> Awo oYesu era n'abakoba ati, “Nkaali ndi na bingi ebyokubakobera, neye byabba ng'atyanu bibitiriri inywe okubikwata.

<sup>13</sup> Neye iye oMwoyo amanyikisya abantu amazima agakwata oku Kibbumba oweyaliiza, yalibalungamya ni mumanya amazima ago gonagona. Ekyo kityo olw'okubba tiyalitumula kululwe, wazira yalitumulanga biibyo byonkani ebiyaliwuliranga okuzwa egiri oKibbumba, era n'okubakoberanga ebyaba okwiza.

<sup>14</sup> Era oMwoyo oyo yangulumalyanga olw'okubba yabakoberanga kiikyo ekiyawuliranga okuzwa egyendi.

15 Kale ebintu byonabyona oBbaabba ebyalin-abyo byange, era ekyo niikyo ekigira ni mbakoba inywe nti oMwoyo yabakoberanga bi-ibyo ebiyawuliranga okuzwa egyendi.”

### *Enima n'eisangaalo*

16 Awo oYesu n'abakoba ati, “Omwibbanga litono mwabba nga timukaali mumbona, kaisi tete oluzwanyuma lw'eibbanga litono, mumbone.”

17 Awo abamo oku beegibe ni bakobangana bati, “Ategeeza niki okutukoba ati, ‘Omwibbanga litono mwabba nga timukaali mumbona, kaisi oluzwanyuma lw'eibbanga litono tete mumbone,’ era ati, ‘Ekyo kityo olw'okubba njaba egiri oBbaabba?’ ”

18 Era ni beegumya okwebuulyangana bati, “Ategeeza niki okukoba ati, ‘Mwibbanga litono?’ Cooka titutegeera ekyo ekyakoba.”

19 Awo oYesu n'ategeera ati bataka okumubulya oku bintu ebyo, kale n'abakoba ati, “Muli kwebuulyangana ku kintegeezere owenkobere nti, ‘Omwibbanga litono mwabba nga timukaali mumbona, kaisi tete oluzwanyuma lw'eibbanga litono, mumbone?’

20 Aale mbakobera amazima nti, inywe mwalikunganga era mwalikubbanga enduulu, neenu abantu abakola eby'ekyalo nga ibo bajaagaana. Inywe enima yalibakwata, neye tete enima yaanywe yalisuukamu isangaalo.

21 Cooka kyalibba ooti mukali alumwa. Iye abba omu bulumi bungi olw'okubba ekiseerakye kibba kituukire. Neye owaamala okubyala,

yeerabira okugada okunene okwabbairemu, olw'eisangaalo ery'okubyala omwana oku kyalo.

<sup>22</sup> Kale inywe, atyanu ikyo kiseera kyanywe ekyenima, neye tete nalibabona era ni musangaala, era mpaawo eyalibatoolaku eisangaalo lyanywe.

<sup>23</sup> Era ekiseera ekyo owekyalituuka mwalibbanga tete mpaawo ekimunsaba. Cooka mbakobera amazima nti oBbaabba yalibba ng'abawa buli ekimumusaba omu liina lyange.

<sup>24</sup> Wazira paka lwatyanu mubbaire mukaali okumusabangaku ekintu kyonakyona omu liina lyange. Neye atyanu aale musabenge era mwalisuna, n'eisangaalo lyanywe lyalibba mu bwizulye."

### *Okuwangula ekyalo*

<sup>25</sup> Era oYesu ni yeeyongera ati, "Waire nga nzwa okutumulanga ebintu ebyo mu ngero, ekiseera kyaba okutuuka mbe nga tinkaali ntumula nga nkolesya ntumula eeyo, wazira nga mbakobera lwatu ebifa oku Bbaabba.

<sup>26</sup> Era omu kiseera ekyo mwalibbanga musaba mu liina lyange. Cooka tindi kukoba nti kyalyetaagisyanga ninze okubasabiranga egiri oBbaabba okubawa ekimwasabanga.

<sup>27</sup> Wazira oBbaabba iye onyere abataka yabawanga ekimwamusabanga olw'okubba muntaka era mwikirirya muti nazwire giri niye.

<sup>28</sup> Nze nazwire giri Bbaabba kaisi ni njiza oku kyalo. Kale atyanu ndi kuzwa oku kyalo, era nkanga egiri oBbaabba."

<sup>29</sup> Awo abeegi ba Yesu ni bakoba bati, “Cooka awo atyanu oli kutumulanga lwatu era nga tokolesya ngero.

<sup>30</sup> Era atyanu tutegeire tuti omaite ebintu byonabyona, era tuti tikyetaagisya waire n’omuntu yenayena okukubuulya ebibuulyo. Era ekyo kituzweramu kwikirirya tuti wazwire giri Kibumba.”

<sup>31</sup> Kale awo oYesu n’ababuulya ati, “Atyanu mwikirirya?

<sup>32</sup> Neye ekiseera kiiza, era kituukire, owemwasalaanikira buli muntu okukanga e wuwe. Inywe mwaba kundeka zenkani. Cooka ekinyere kiri kiti tinaabbe zenkani olw’okubba oBbaabba ali aamo na nze.

<sup>33</sup> Era ebyo mbibakobeire, kaisi olwo mubbe n’eidembe omu myoyo gyanywe olw’enkolagana yaanywe na nze. Cooka oku kyalo kunu mwabanga n’okugada, neye mugume olw’okubba nze mpangwire amaani g’ekyalo kinu.”

## 17

### *OYesu yeesabira iye onyere*

<sup>1</sup> Awo oYesu oweyamalire okutumula ebyo, n’agangamula omutwe okulingirira omwigulu kaisi n’asaba ati:

“Bbaabba, ekiseera kituukire. Aale atyanu olage abantu ekitiisya ky’oMwanawo ng’owekiri eky’amaani, kaisi yena ayezye okubalaga ekitiisyakyo eky’amaani.

<sup>2</sup> Ekyo kityo olw’okubba wamuwaire obwezye oku bantu bonabona, kaisi ayezye

okubawa ibo nago abewamuwaire obwomi obutawaawo.

<sup>3</sup> Era ibwo obwomi obutawaawo obwo busunika mu ngeri eenu eti: Abantu bali n’okukumanya niiwe oKibbumba wenkani onanyerenyeere, era n’okumanya oYesu Kurisito oguwatumire okununula abantu.

<sup>4</sup> Nze ndagire abantu ekitiisyakyo ng’owekiri eky’amaani omu kukola era ni mmala omulimo oguwampaire okukola.

<sup>5</sup> Bbaabba, aale atyanu tete onganye mbe n’ekitiisya kidi ekinabbaire nakyo owenabbaire na iwe omwigulu nga n’ekyalo kikaali n’okubbaawo.”

*OYesu asabira abeegibe*

<sup>6</sup> Awo oYesu ni yeeyongera okusaba ati, “Mmanyikisirye abantu abewampaire, ikyo ekyo ekyoli. Abantu abo nago niibo abewampaire ng’obatoola mu badi abakwikiriryamu. Ibo abantu abo babbaire babo, n’obampa era bakwaite ekibonokyo.

<sup>7</sup> Era atyanu bamaite bati obukwenda n’ebyo byonabyona ebinkola bizwa giri niiwe.

<sup>8</sup> Ekyo kityo olw’okubba nabakobeire ebi-bono ebiwampaire, era ni babiikirirya. Era bakakasiire nakimo bati nazwire giri niiwe, era ni baikirirya bati wantumire.

<sup>9</sup> Kale mbasabira. Cooka tindi kusabiranga bantu abatakwikiriryamu, wazira nsabira baabo abewampaire olw’okubba babo.

<sup>10</sup> Era abo abendi nabo bonabona babo, n’ababo era bange. Era balagire bati ekitiisya kyange ky’amaani.

<sup>11</sup> Aale atyanu nze ngonu njaba okuzwa oku kyalo era ndi kwiza e gyoli neye ibo bakaali bali oku kyalo. Iwe Bbaabba oMutukulye, obaku-umenge omu bwezyebwo obuwampaire kaisi bayezye okubbanga nakimo ooti niiswe owetuli ekimo.

<sup>12</sup> Era owenabbaire nabo, cooka olw'obwezye obuwampaire, nabakuumire era ekigosi nandi kibatuukaku. Era mpaawo kwibo eyagotereku okutoolaku oyo eyabbaire ateekwa okugota kaisi eKiwandiike kyezye okutuukirira.”

<sup>13</sup> Awo oYesu ni yeeyongera okusaba ati, “Aale ngonu atyanu njiza egyoli, neye ebyo mbitumula nga nkaali ndi oku kyalo kaisi eisangaalo lyange libbe mu bwizulye omu basengereri bange.

<sup>14</sup> Era nabawaire ekibonokyo n'olwekyo ekyalo ni kibacaawa olw'okubba nti ibo nago tibakaali b'ekyalo ooti ninze owentali w'ekyalo.

<sup>15</sup> Cooka tinkusaba nti obatoole oku kyalo, wazira nti obakuume eeri omubbimubbi oSi-taani.

<sup>16</sup> Nti ibo tibekyalo ooti ninze owentali waakyo.

<sup>17</sup> Aale obatukulye ng'okolesya obwezye bw'ekibonokyo. Nti ekibonokyo niigo amazima.

<sup>18</sup> Cooka ng'owewantumire oku kyalo, ntyo zena niiyo owembatumire oku kyalo.

<sup>19</sup> Nze newaayo egyoli kaisi bona abanyere bayezye okweweerayo nakimo egyoli.”

*OYesu asabira abaikiriryabe*

20 Awo oYesu ni yeeyongera okusaba ati, “Tinsabira beegi banu bonkani, neye n’abo abalinjikiririyamu olw’obukwenda bwa banu.

21 Era Bbaabba, ekyo kityo kaisi bonabona babbenge bumo, ooti niiwe obwoli ekintu ekimo na nze, era zena owendi ekintu ekimo na iwe. Mbasabira nti bona babbenge kintu kimo na iswe kaisi abantu bayezye okwikirirya bati iwe wantumire.

22 Era mbasuucirye okubba b’ekitiisya zena ng’owonsuucirye kaisi bayezye okubbanga ekintu ekimo ooti ninze owendi ekintu ekimo na iwe.

23 Ekikoba kiti, ntaka ibo beegaite nga ibo owebali bagaite na nze era nga iwe obwoli mugaite na nze. Era mbasabira nti babbeere nakimo kintu kimo, kaisi abantu bategeere bati wantumire, era obataka ng’owontaka.”

24 Era oYesu ni yeeyongera ati, “Bbaabba, abantu abewampaire, ntaka lubbe lumu nga bali na nze omwigulu eeyo eginjaba okubba, era babbeeyo okubonaku ekitiisya ekinalibbaamu. Cooka ekitiisya ekyo wakimpaire olw’okubba wantakire nga n’ekyalo tikibumbe.

25 Bbaabba omutuukirirye, abantu tibakumaite, neye nze nkumaite, era bamaite bati wantumire.

26 Era nabamanyikisirye ikyo ekyo ekyoli, era njaba okweyongera okubamanyikisya ikyo ekyo nago, kaisi bona batakenge abantu abandi ooti niiwe owewantakire era kaisi nze mbe kimo nabo.”

# 18

## *Bakwata oYesu*

*(Mat 26:47-56; Mak 14:43-50; Luk 22:47-53)*

<sup>1</sup> Awo oYesu oweyamalire okusaba okwo, n'asimbuka n'abeegibe, ni basalamu ogwinamo ogubeeta bati Kidulooni. Okwitale kudi okubayambukire wabbaireyo omusiri gw'emisaale emizaituuni era iye n'abeegibe ni baingira oomwo.

<sup>2</sup> Atyanu iye oYuda, eyamuliiremu olukwe, yabbaire amaite ekifo ekyo olw'okubba oYesu yatiranga okwaba n'akumbaana eeyo n'abeegibe.

<sup>3</sup> Kale awo oYuda n'ayaba omu musiri ogwo nago ng'akudembereire ekibinja ky'abaisirikale, n'abakuumi abamo ab'eYeekaalu. Era ibo abo abeyabbaire yeekubbembereire, abakabona abakulu n'aBafalisaayo niibo ababbaire babatunire. Era ibo nago babbaire bakwaite ebimoleka ooti mole n'amataala era n'ebyokulwanisya.

<sup>4</sup> Cooka oYesu yamaite byonabyona ebyaba okumutuukaku, kale awo ni yeetoolayo, era n'ababuulya ati, "Munoonia naani?"

<sup>5</sup> Awo ibo ni bamwiramumu bati, "Yesu ow'e Naazaleesi." OYesu n'abakoba ati, "Ninze onu." Era oYuda eyamuliiremu olukwe, yabbaire ayemereire awo nabo.

<sup>6</sup> Cooka oYesu oweyabakobere ati, "Ninze onu," ibo ni baira e nyuma era ni bagwa ansi.

<sup>7</sup> Awo oYesu n'ababuulya omulundi ogwoku-biri ati, "Munoonia naani?" Tete ni bairamu bati, "Yesu ow'e Naazaleesi."



<sup>8</sup> Era oYesu n'abairamu ati, "Mbakobeire nti ninze onu. Aale obanga munoonia ninze, muleke abeegi bange banu ibo baabe."

<sup>9</sup> Ekyo kyabbairewo kaisi olwo ebibono ebiyabaire atumwire byezye okutuukirira, ebikoba biti, "Kwabo abewampaire tinagoteryeku kadi moiza."

<sup>10</sup> Cooka oSimooni Peetero omoiza oku beegi ba Yesu yabbaire n'empiiima, kale awo n'agitoologyo, n'atemaku omugalama wa kabona akira obukulu ekitwi eky'oku ndiirero, n'amutiicaaku. Era omugalama oyo nago yabbaire niye oMaluko.

<sup>11</sup> Awo oYesu n'alagira oPeetero ati, "Empiimayo ogikanjeeyo omu kiruutu kyayo. Iwe os-eega oti tindi n'okubita omu kipimo kyokugada kudi oBbaabba okwataka mbitemu?"

### *OYesu bamutwala egiri Anasi*

<sup>12</sup> Awo ekibinja ky'abaisirikale n'omuduumiri waabwe, era n'abakungu b'aBayudaaya ni bakwata oYesu. Awo ni bamusibira aamo engalogye e nyuma,

<sup>13</sup> kaisi ni basooka bamutwala egiri Anasi. Oyo yabbaire niye oiteeye wa muka Kayaafa era oKayaafa oyo yabbaire niye okabona akira obukulu omu mwanka ogwo.

<sup>14</sup> Era oKayaafa nago niye eyabbaire awaire aBayudaaya amalabuki ati kibba kisa omuntu omoiza okufeererera abantu.

*OPeetero yeegaana oYesu  
(Mat 26:69-70; Mak 14:66-68; Luk 22:55-57)*

<sup>15</sup> Awo oSimooni Peetero n’omwegi omwinaye ni basenjaaku oYesu. Cooka omwegi oyo olw’okubba yabbaire mumanye eeri okabona akira obukulu, iye n’asinjaaku oYesu ni baingira omu luuga lwa kabona oyo.

<sup>16</sup> Neye iye oPeetero yabbaire n’okukuumira nza ku geeti. Kale omwegi oodi nago eyabbaire omumanye, n’akanga e nza okutumula n’omwala eyabbaire omukuumi w’oku geeti, era n’aingirya oPeetero.

<sup>17</sup> Awo omwala oyo nago n’abuulya oPeetero ati, “Wena toli moiza oku beegi b’omusaiza nago?” Iye oPeetero n’amwiramumu ati, “Nze bbe.”

<sup>18</sup> Cooka empewo yabbaireku era abagalama ba kabona akira obukulu n’abakuumi b’eYeekaalu babbaire beemereire okweruguulirirya ekisiki ky’omusyo ekibabbaire bakumire okwota. Kale awo oPeetero yena yabbaire ayemereire nabo ng’ayota omusyo.

*Okabona akira obukulu abuulya oYesu  
(Mat 26:59-66; Mak 14:55-64; Luk 22:66-71)*

<sup>19</sup> Awo, okabona akira obukulu n’abuulya oYesu oku beegibe, n’okwebyo iye oYesu ebyayegesya.

<sup>20</sup> Iye oYesu n’amwiramumu ati, “Nze ntumulanga lwatu eeri abantu. Nze nenca njegesyanga omu makumbaaniro n’omu luuga lw’eYeekaalu aBayudaaya bonabona omu bakumbaaniranga. Tintumulangaku kintu kadi kimo omu kyama.

21 Kale aale lwaki obuulya ninze? Obuulye baadi abawuliranga ebinatumulanga. Mazima ibo babimaite.”

22 Awo oYesu oweyatumwire ebyo, omoiza oku bakuumi b’eYeekaalu eyabbaire okumpi n’oYesu, n’amukubba oluwi okwitama neenu waamukoba ati, “Eyo niiyo engeri egyoiramu okabona akira obukulu?”

23 Iye oYesu n’amwiramumu ati, “Obanga ekin-tumwire tikituce, kaade okakase obutali butu-uce bwakyo. Neye obanga ntumwire kituuce, lwaki onkubbire?”

24 Awo oYesu ng’akaali musibe w’engalogye Anasi n’amuweererya egiri oKayaafa okabona akira obukulu.

*OPeetero yeeyongera okwegaana oYesu*

*(Mat 26:71-75; Mak 14:69-72; Luk 22:58-62)*

25 Awo oSimooni Peetero oweyabbaire ng’ayemereire ayota omusyo, tete ni wabbaawo omuntu ogondi n’amubuulya ati, “Iwe wena toli moiza oku beegi b’omusaiza nago?” Iye ni yeegaana ng’akoba ati, “Nze bbe.”

26 Cooka omoiza oku baweererya ba kabona akira obukulu, era omuganda w’oodi oPeetero oguyatiiciryeku ekitwi, n’amulumiriza ati, “Tinakuboine naye eedi omu musiri gw’emisaale emizaituuni?”

27 Awo tete era oPeetero n’akyegaana, era n’omu kiseera ekyo onkoko n’akookoola.

*OYesu omumaiso ga Piraato*

*(Mat 27:1-2,11-14; Mak 15:1-5; Luk 23:1-5)*

28 Awo oYesu ni bamutoola e wa Kayaafa, ni bamutwala omu lubiri lw’omufugi omu

Looma. Omu kiseera ekyo obwire bwabbaire bwankaca. Era aBayudaaya tibaingiire omu lubiri olw'okubba okwingira kyabbaire kibasuuca okubba tibasukulye era ni babba nga tibasaanira okulya oku Mukolo ogw'oKutambukirya.

<sup>29</sup> N'olwekyo oPiraato n'awuluka nza egibali era n'ababuulya ati, "Musangoki ogumuvunaana omusaiza onu?"

<sup>30</sup> Ibo ni bamwiramumu bati, "Singa abbaire abula musango, titwandimuleetere okumukukwatisya."

<sup>31</sup> Awo oPiraato n'abakoba ati, "Aale atyanu inywe mumutwale mumuwozesye okusinzirira oku mateeka agaanywe."

ABayudaaya ni bamukoba bati, "Nti iswe tibatikirirya kwita muntu yenayena."

<sup>32</sup> Ekyo kyabbairewo kaisi oYesu ebibono ebiyabbaire atumwire ng'alaga engeri egiyabbaire ayaba okufaamu, byezye okutuukirira.

<sup>33</sup> Awo oPiraato n'akanga omu lubiri, kaisi n'alagira ni beeta oYesu kaisi n'amubuulya ati, "Niiwe okabaka w'aBayudaaya?"

<sup>34</sup> OYesu n'amwiramumu ati, "Ekyo kiseegokyo, ooba bandi niibo abakukobeire ebinkwataku?"

<sup>35</sup> Awo oPiraato n'amubuulya ati, "Nze ndi Muyudaaya? Ibo bantu b'eigwangalyo, n'abakabona baanywe abakulu niibo abakunkwatisirye. Olwo nago niki ekyokolere?"

<sup>36</sup> OYesu n'amwiramumu ati, "Obwakabaka bwange tibwa ku kyalo kunu. Singa ekyo kibbaire kityo, abantu bange bandirwaine,

ni bakaisya aBayudaaya okunkwata. Neye obwakabaka obwange ibwo buzwa awandi.”

<sup>37</sup> Awo oPiraato n’amubuulya ati, “Olwo oli kabaka?”

OYesu n’amwiramumu ati, “Otuucirye okukoba oti ndi kabaka. Igo amazima gali gati, nze bambyaire kubba Kabaka era niikyo ekyandetere oku kyallo kunu era n’okukakasa abantu amazima. Era buli ataka amazima, ampulisisya.”

<sup>38</sup> Awo oPiraato n’amubuulya ati, “Amazima niikyo niki?”

Opiraato oweyamalire okubuulya oYesu ebyo, iye oPiraato n’awuluka tete e nza egiri aBayudaaya era n’abakoba ati, “Timbona ekyokuzweraku okumuvunaana omusango gwonagwona.

<sup>39</sup> Neye inywe munaliriire nze okubateererangaku omusibe moiza oku lunaku lw’oMukolo ogw’oKutambukirya. Kale olwo mutaka mbatteerere nago yoodi ogumukoba muti kabaka w’aBayudaaya?”

<sup>40</sup> Cooka ibo ni bakooka nga bamwiramumu bati, “Bbe, tiyooyo! Otuwe Bbalaba!” OBbalaba oyo nago yabbaire musibe olw’akeediimo akeyabaire yeemigiiremu.

## 19

*OYesu bamusalira ogw’okufa*

*(Mat 27:15-31; Mak 15:6-20; Luk 23:13-25)*

<sup>1</sup> Awo oPiraato n’alagira abaisirikale okutwala oYesu bamufaamuule n’ofaalu aliku emirobo egisima.

<sup>2</sup> Era abaisirikale ni baluka engule eya mawa kaisi ni bagimuzwalisya oku mutwe. Bamuzwalisiryeye n'eganduula entukuliikiriri,

<sup>3</sup> era ni basoosera okumwabaku okumukiina bati, "Owangaale, iwe oKabaka w'aBayudaaya!" Era batyo nga webamukubba empi oku matama.

<sup>4</sup> Awo oPiraato era tete n'awuluka e nza, n'akoba aBayudaaya ati, "Aale mumpulisisyeku, ngonu njaba okumuwuluca egimuli okubamanyikisya nti timbona ekyokuzweraku okumuvunaana omusango gwonagwona."

<sup>5</sup> Awo oYesu ni bamuwuluca nga bamutiikire engule ey'amawa, era nga bamuzwalisiryeye eganduula entukuliikiriri kaisi oPiraato n'abakoba ati, "Aale mubone omusaiza nago!"

<sup>6</sup> Amangu ago ibo abakabona abakulu n'abakuumi b'eYeekaalu owebamuboine, ni bakooka bati, "Omukomerere oku musalabba, omukomerere oku musalabba!"

Neye oPiraato n'abakoba ati, "Inywe mutwale mumukomerere, neye okulwange timbona ekyokuzweraku okumuvunaana omusango gwonagwona."

<sup>7</sup> Era ibo aBayudaaya ni beekalangula bati, "Iswe tuli n'eiteeka, era okusinzirira okwiteeka eeryo, atekwa kufa olw'okubba yeeyeta okubba Mwana wa Kibbumba."

<sup>8</sup> Awo oPiraato oweyawuliire ekyo, era ni yeeyongera ino okutya.

<sup>9</sup> Kale n'alagira ni bakanjaayo oYesu omu lubiri kaisi n'ayaba n'abuulya oYesu ati, "Ozwera yaina?" Neye oYesu tiyamwiriremu.

10 Awo oPiraato n'amubuulya ati, "Ogaine okunjiramu? Tomaite oti ndi n'obwezye okuku-teera ooba okukukomerera oku musalabba?"

11 OYesu n'amwiramumu ati, "Tiwandibbaireku n'obwezye singa tiKibbumba kubukuwa. N'olwekyo iye oodi ampaireyo egyoli niiye aali n'ekibbikibbi ekikiraku."

12 Okuzwa omu kiseera ekyo oPiraato n'agezyaku okuteera oYesu neye aBayudaaya nga beeyongera kukooka bati, "Singa oteera omusaiza oyo, waabba toli mukaagwa wa Kaisaali. Nti omuntu yenayena iye eyeeyeta okubba kabaka, abba ayakanisya Kaisaali."

13 Awo oPiraato oweyawuliire ebyo, n'alagira ni bawuluca oYesu oku luuga. Era oku luuga awo oPiraato n'atyama oku ntebeye ey'obulamuzi omu kifo ekibeeta bati Kya Mabbale aMaalirire, neye omu Lwebbulaniya bati, Gabbasa.

14 Era esaawa gyabbaire ooti mukaaga egy'omusana oku lunaku lwa kutegeka oMukolo ogw'oKutambukirya. Awo oPiraato n'akoba aBayudaaya ati, "Aale mumpulisisyeku, okabaka waanywe ngoyo!"

15 Neye ibo era ni bakooka bati, "Omumalewo, omumalewo, omukomerere oku musalabba!"

Awo oPiraato n'ababuulya ati, "Okabaka waanywe gumbe nkomerere oku musalabba?"

Abakabona abakulu ni bamwiramumu bati, "Tubula kabaka gondi, wazira oKaisaali."

16 Kale awo omu kukomenkereza, oPiraato n'abakwatisya oYesu baabe bamukomerere oku musalabba.

*OYesu bamukomerera oku musalabba  
(Mat 27:32-44; Mak 15:21-32; Luk 23:26-43)*

Awo abaisirikale ni bakwata oYesu, ni bamu-toolawo.

<sup>17</sup> Era omu kwaba yabbaire nga yeetiikire omusalabbagwe okwaba omu kifo ekibeeta eky'eKiyanga, omu Lwebbulaniya ekibeeta Golgoosa.

<sup>18</sup> Era omu kifo ekyo niiyo egibamukomereire oku musalabba. Era omu kifo ekinyere ekyo ni bakomerera n'abandi babiri oku misalabba gyabwe, oku lubba n'olubba, oYesu nga iye abalimu aakati.

<sup>19</sup> Awo oPiraato n'alagira ni bawandiika ekiwandiiko, ni bakikubbirira e ngulu oku musalabba, nga kisoma kiti, "OYESU OW'E NAAZA-LEESI, OKABAKA W'ABAYUDAAYA."

<sup>20</sup> Era aBayudaaya bangi ni basoma ekiwandiiko ekyo olw'okubba ekifo ekyo egibakomereire oYesu, kyabbaire kumpi n'ekibuga. Era nti n'ekiwandiiko ekyo nago babbaire bakiwandiikire mu Lwebbulaniya, n'omu Lulantini, n'omu Luyonaani.

<sup>21</sup> Awo abakabona abakulu ab'aBayudaaya ni bakanga egiri oPiraato okwezuluguma bati, "Tibandikiwandiikire bati, 'Kabaka w'aBayudaaya,' wazira tutaka bakiwandiike bati, 'Omusaiza onu abbaire yeeyeta Kabaka w'aBayudaaya.' "

<sup>22</sup> Awo oPiraato n'abairamu ati, "Ekyo ekyendagiire nti bawandiike kiri n'okubba kinyere ekyo."

<sup>23</sup> Cooka abaisirikale owebamalire okukomerera oYesu oku musalabba, ni batwala



ebizwalobye, ni babigabulamu emigabo eena, buli mwisirikale n’asunaku gumo. Neye iyo ekanzuye ey’omunda iyo n’esigala. Iyo babbaire tibagitungire-butungi, neye nga bagirukire-buluki yonayona okuzwa angulu paka ansi.

<sup>24</sup> Kale abaisirikale ni bakobangana bati, “Titwaginyiiramu, neye tugikubbireku kalulu okusalawo eyagitwala.”

Ekyo kyabbairewo kutuukirirya Kiwandiike ekikoba kiti:

“Bagabanire ebizwalo byange,  
era engoye gyange ni bagikubbiraku  
akalulu.”

Kale abaisirikale bona ekyo niikyo ekibakolere.

<sup>25</sup> Awo okumpi n’omusalabba gwa Yesu, wabbairewo omaaye, n’omuganda wa maaye, n’oMalyamu omuka Kulopaasi, era n’oMalyamu oMangadaleena nga beemereire.

<sup>26</sup> Kale oYesu oweyaboinewo omaaye, n’omwegi oodi oYesu oguyatakanga eino nga beemereire okumpi aawo, n’akoba omaaye ati, “Mama, oyo omutwale ng’omwanawo,”

<sup>27</sup> era n’akoba n’omwegiwe oyo nago ati, “Oyo omutwale ng’omaawo.” Okuzwa olwo omwegi oyo n’atandiika okulabirira omaaye wa Yesu ng’omoiza oku bantu b’omu kisitokye.

### *Okufa kwa Yesu*

*(Mat 27:45-56; Mak 15:33-41; Luk 23:44-49)*

<sup>28</sup> Awo oluzwanyuma ng’oYesu amalire oku-  
manyanya ati amalire emirimo egibamutumire

okukola era okutuukirirya eKiwandiike, n'akoba ati, "Enyonta enduma."

<sup>29</sup> Abaisirikale babbaire bateekere awo ensaka eizwire enviinyo ensasaami kale ni batimyamu ekijuulo. Awo ni bakiteeka oku kasaale akebeeta yisopu, kaisi ni basiirya okukituuca oku munwagwe.

<sup>30</sup> Awo oYesu oweyafunfuunireku enviinyo ensasaami egyo, n'akoba ati, "Kiwoire." Era n'ekibono ekyo n'akotamya omutwe, era n'afa.

*OYesu bamusumuta omu mpete*

<sup>31</sup> Awo, lwabbaire lunaku lwa kutegeka era ng'eizo lwabba Saabbaato olukulu. Kale olw'okubba abeekubbemberi b'aBayudaaya babbaire tibataka emirambo okutuuca oku Saabbaato nga giri oku musalabba, ni basaba oPiraato olukusa bavune ebigere by'abantu nago era n'emirambo bagyanuleyo.

<sup>32</sup> N'olwekyo abaisirikale ni baiza okuvuna ebigere byabwe moiza moiza nga basookera oku basaiza badi abebabbaire bakomereire aamo n'oYesu buli muntu oku musalabbagwe.

<sup>33</sup> Neye owebatuukire oku Yesu, ni babona nga iye amalire okufa, tibamuvunire ebigere.

<sup>34</sup> Awo, iye omu kifo ky'okumuvuna, omoiza oku baisirikale n'amusumuta eisimo omu mpete okukakasa ng'afiire, amangu ago ni muzwamu omusaaye n'amaizi.

<sup>35</sup> Era omusaiza eyaboineku ng'ekyo kibbaawo yakikobeire abantu, era n'ekiyabakobeire ni kibba kituuce. Iye omusaiza nago amaite ati

atumula mazima era akola atyo kaisi nywena mwezye okwikirirya.

<sup>36</sup> Ebyo byabbairewo kaisi olwo eKiwandiike kituukirire ekikoba kiti, “Tibalimuvunaku eigumba kadi limo,”

<sup>37</sup> era nga n’eKiwandiike ekindi owekikoba kiti, “Baliringirira yoodi ibo ogubalibba basumutire.”

*Okuliika oYesu*

*(Mat 27:57-61; Mak 15:42-47; Luk 23:50-56)*

<sup>38</sup> Ebyo owebyawoire, oYusufu ow’Alimasaaya, n’ayaba n’asaba oPiraato omulambo gwa Yesu. Era oYusufu oyo nago yabbaire mwegi wa Yesu, neye nga w’omu mbiso olw’okutya aBayudaaya. Awo ng’asunire olukusa okuzwa eeri oPiraato, n’ayaba n’atoolayo omulambo gwa Yesu.

<sup>39</sup> OYusufu yabbaire n’oNikodemu omusaiza nago enyumaku eedi eyacaaliire oYesu obwire. Era oNikodemu yaabire n’ekiro ooti 33 egya kalifuwa ogubeeta omiira omutabulemu ekigaji.

<sup>40</sup> Awo ni batwala omulambo gwa Yesu nga bagusiigire okalifuwa, ni bagulingira omu ngoye gya lineni empyaka! Eyo yabbaire niiyo empisa y’aBayudaaya ey’okuliika abafu.

<sup>41</sup> Omu kifo oYesu egibamukomereire oku musalabba, wabbairewo omusiri omwabbaire amagombe ag’empuku amayaaka, agebabbaire tibateekangakuumu mulambo.

<sup>42</sup> Era olw’okubba wabbaire kumpi, oomwo niimwo omu batekere omulambo gwa Yesu.

Ekyo kityo olw'okubba lwabbaire lunaku lw'aBayudaaya kwetegekaraku ng'eizo lwabba Saabbaato.

## 20

*Okuzuukira kwa Yesu  
(Mat 28:1-8; Mak 16:1-8; Luk 24:1-12)*

<sup>1</sup> Awo oku lunaku olwesaabbiiti\* oMalyamu oMangadaleena n'awuuna makeezi pwi omu kandikiirya oku magombe ag'empuku aga Yesu. Cooka yaajiirye eibbaale eryabbaire omu mulyango nga balitoirewo.

<sup>2</sup> N'olwekyo n'airuka egiri oSimooni Peetero, n'omwegi odi ogondi oYesu oguyatakanga eino, n'abakoba ati, "OMusengwa bamutoiremu omu magombe, era titumaite n'egibamuteekere!"

<sup>3</sup> Awo oPeetero n'omwegi odi nago ni basimbuka ni baaba oku magombe.

<sup>4</sup> Bonabona baabire nga bairukira aamo, neye omwegi oodi nago n'akiraku oPeetero okwiruka, n'amusooka oku magombe.

<sup>5</sup> Cooka tiyaingiiremu wazira yakomere mu mulyango era n'akotama okulolamu, n'abona ngoye egya lineni nga bagiteekere awo.

<sup>6</sup> Awo oSimooni Peetero eyabbaire amusenjaaku yena n'atuuka neye iye n'aingiramu, era yena n'abona omu magombe ngoye gya lineni nga bagiteekere awo.

<sup>7</sup> Era yaboine n'ekiwero ekibabbaire basibiire oYesu oku mutwe okubwika omumaiso. Ikyo kyabbaire bakiringire kusani nga tibakiteekere

---

\* **20:1 20:1** EBbaibbuli egimo gikoba giti, *Lunaku olusooka omu saabbiiti.*

aamo engoye gidi egya lineni neye nga kiri kyonkani.

<sup>8</sup> Oku nkomerero omwegi odi nago eyabbaire n'oPeetero era eyeekeereire okutuuka oku magombe, yena n'aingira n'abona, era n'aikirirya.

<sup>9</sup> Neye era babbaire bakaali okutegeera eKiwandiike ekiti, oYesu yabbaire atekwa okuzuukira.

<sup>10</sup> Awo abeegi abo ni bakanga egibaabbanga.

*OYesu abonekera oMalyamu oMangadaleena  
(Mat 28:9-10; Mak 16:9-11)*

<sup>11</sup> Neye oMalyamu oMangadaleena yabbaire ayemereire e nza w'amagombe ag'empuku nago, ng'akunga. Kale awo oweyabbaire akaali akunga, n'akotama n'alola omu magombe,

<sup>12</sup> era n'abona abamalaika babiri. Babbaire mu bizwalo byeru nga batyaime, omoiza e namutwe, n'ogondi e nabigere omu kifo egibabbaire batekere omulambo gwa Yesu.

<sup>13</sup> Awo ni bamubuulya bati, "Mukali iwe, okunga niki?" Iye n'abairamu ati, "OMusengwa wange bamutoiremu, era timmaiteku egibamu-teekere!"

<sup>14</sup> Awo oMalyamu oweyamalire okutumula ebyo, n'agaluka n'alola e nyuma, n'abona oYesu ng'ayemereire awo, neye tiyamumanyicirye ati niye oYesu.

<sup>15</sup> Awo oYesu yena n'amubuulya ati, "Mukali iwe, okunga niki? Onoonia naani?" Iye oMalyamu olw'okumusubiriramu okubba niye omulabiriri w'omusiri ogwo, n'amukoba ati,

“Sebo, obanga niiwe omutoiremu, ondagirire egyomuteekere njabe mmutooleyo.”

<sup>16</sup> Awo oYesu n’amweta ati, “Malyamu!” Awo oMalyamu n’agaluka okumulolaku, kaisi n’amukoba omu Lwebbulaniya ati, “Labbooni!” Ekitegeeza kiti, “Musomesya.”

<sup>17</sup> Awo oYesu n’amukoba ati, “Tiwaneevambiryaku olw’okubba nkaali okukanga egiri oBbaabba. Wazira oyabe egiri abaganda bange obakobere oti, ‘Nkanga egiri oBbaabba era oItewanywe, oKibbumba wange era oKibbumba waanywe.’ ”

<sup>18</sup> Era oMalyamu oMangadaleena n’ayaba, n’akobera abeegi ati, “Mboine oMusengwa!” Era n’abakobera oMusengwa ebyamukobere.

*OYesu abonekera abeegibe*

*(Mat 28:16-20; Mak 16:14-18; Luk 24:36-49)*

<sup>19</sup> Awo oku lunaku lwesaabbiiti olwo nago eigulo abeegi babbaire beefungiriirye omu nyumba olw’okutya aBayudaaya, oYesu n’aiza, n’abeemereramu aakati, n’abakoba ati, “Eidembe libbe na inywe!”

<sup>20</sup> Oweyamalire okutumula atyo, n’abalagisya engalogye n’ebigerebye n’empetegye. Awo abeegi ni basangaala ino owebaboineku oMusengwa.

<sup>21</sup> Era n’airamu n’abakoba ati, “Eidembe libbe na inywe. Ng’oBbaabba oweyantumire, zena mbatuma.”

<sup>22</sup> Oweyamalire okutumula ebyo, n’abayeereraku omuyeerero, n’abakoba ati, “Musune oMwoyo oMutukulye.

23 Owemwasoniyanga omuntu yenayena ebikole ebibbibbi ebyakola, oKibbumba yena yaabbanga amusonyire era singa owemutamusonyenge, oKibbumba yena yaabbanga tamusonyire.”

*OYesu yeeragisya egiri oTomasi*

24 Awo oTomasi omoiza oku beegi eikumi na babiri, ogubeeta oDidimo,† tiyabbaire n’abainaye oYesu oweyabeeragisiirye.

25 Kale abeegi abainaye ni bamukobera bati, “Tuboine oMusengwa.”

Neye iye n’abakoba ati, “Okutoolaku nga mboineku enkozu egy’emisumaali omu ngalogye, era ni nkubya olunwe lwange omu nkozu nago, era ni nkwata n’omu mpetegye, tinakikirirye.”

26 Awo owewabitirewo enaku munaana, abeegi ba Yesu tete babbaire bali omu nyumba, leero nga bali n’oTomasi. Waire nga babbaire beefungiriirye oomwo, oYesu n’aingira n’ababbaamu nga ayemereire, kaisi n’abakoba ati, “Eidembe libbe na inywe.”

27 Awo n’akoba iye oTomasi ati, “Okubye aanu olunwe, era obone engalo gyange. Era oleete engaloyo onkwate omu mpete. Aale atyanu olekeraawo okubususabusa, wazira oikirirye.”

28 Awo oTomasi n’amwiramumu ati, “Niiwe oMusengwa wange, era oKibbumba wange!”

---

20:23 20:23 Mat 16:19; 18:18 † 20:24 20:24 Litegeeza, OMulongo.

29 OYesu n'amukoba ati, "Iwe oikiriirye olw'okubba omboineku. Ibo nga b'enkabi abatambonangaku neye ni baikirirya!"

*Ekyawandiikisiry ekitabo kinu*

30 OYesu yakolere obumanyiciryo bw'ebyewunyo obundi bungi ng'abeegibe babona obutali buwandiike omu kitabo kinu.

31 Neye obwo babuwandiikire kaisi mwezye okwikirirya muti oYesu niye oKurisito ogubasukireku amafuta. Era muti niye oMwana wa Kibbumba, era olw'okwikirirya mutyo, kaisi mwezye okusuna obwomi obutawaawo.

## 21

*OYesu abonekera abeegibe oku nyanza*

1 Ebyo owebyawoire, oluzwanyuma lw'enaku ntono oYesu n'abonekera tete abeegibe oku nyanza oTibberiyu.\* Ikyo kyabbairewo kiti:

2 OSimooni Peetero, n'oTomasi ogubeeta oMulongo, n'oNasanairi ow'e Kaana eky'e Galiraaya, n'abataane ba Zebedaayo, n'abeegi ba Yesu abandi babiri, bonabona abo babbaire aamo.

3 Awo oSimooni Peetero n'abakoba ati, "Nze njaba kuvuba." Ibo ni bamukoba bati, "Swena oleke twabe na iwe." Era awo ni baaba, ni baniina omu lyato. Cooka ekiire ekyo kyonakyona ni batakwatisyaku ekintu.

4 Neye amakeezi nga buca, oYesu n'abonekera oku mbale kw'enyanza ng'ayemereire, Cooka abeegibe ni batamumanyica bati niye.

---

\* 21:1 21:1 Ooba, *Galiraaya*. 21:3 21:3 Luk 5:5



<sup>5</sup> Awo oYesu n'abeeterera ati, "Bainange, mu-papairyekuuyo?" Ni bamwiramumu bati, "Bbe."

<sup>6</sup> Iye n'abakoba ati, "Aale mutege akatimba kaanywe oku lubba lw'engalo endiire lw'eryato era mwapapalyayo." Owebategere ni batezya okukakuusira omu lyato olw'obuzito bw'enyanyi empitiriri egibabbaire bapapairyeyo.

<sup>7</sup> Awo omwegi oodi oYesu oguyatakanga eino, n'akoba oPeetero ati, "Oyo Musengwa!" Amangu ago oSimooni Peetero oweyawuliire ng'oodi akoba ati, "Oyo Musengwa," n'azwala ekizibaa-wokye, olw'okubba yabbaire akitoiremu, kaisi n'agwa omu maizi.

<sup>8</sup> Abeegi badi abandi ni bamusenjaaku nga ibo bali omu lyato, neenu webakuusa akatimba akaizwire enyanyi. Ekyo kyabbaire kityo olw'okubba tibabbaire yala n'okulukalu, ng'eibbanga ly'emita ooti 90.

<sup>9</sup> Awo owebatuukire oku lukalu, ni babona omusyo nga baguteekereku enyanyi, era n'ekyokulya nga kiri awo.

<sup>10</sup> Awo oYesu n'abakoba ati, "Muleeteku enyanyi egimwankazwa okupapalya."

<sup>11</sup> OSimooni Peetero n'aniina omu lyato kaisi n'akulukusa akatimba, n'akasomoca oku lukalu. Kabbaire kaizwire aganyanyi aganene 153. Newankubbaire nga gabbaire gangi ino gatyo, akatimba tikatiikire.

<sup>12</sup> Awo oYesu n'abakoba ati, "Mwize okulya eky'amakeezi." Cooka oku beegibe, mpaawo eyagumire okumubuulya ati, "Niiwe onaani?" Ibo babbaire bamaite bati niiye oMusengwa.

13 Kale oYesu n'ayaba n'atoola ekyokulya n'abawa era n'atoola n'enyanyi gyona n'agibawa.

14 Ogwo atyanu gwabbaire mulundi gwokusatu oYesu okubonekera abeegibe oluzwanyuma lw'okumuzuukiza.

*OYesu batumulamu n'oPeetero*

15 Awo owebamalire okulya, oYesu n'abuulya oSimooni Peetero ati, "Simooni omwana wa Yokaana, ontaka ino okukiraku abainawo?"

Iye n'amwiramumu ati, "Niikyo ekyo Musengwa, era iwe omaite oti nkutaka."

Awo oYesu n'amukoba ati, "Aale olisyenge entaama gyange."

16 Era tete n'amubuulya omulundi ogwokubiri ati, "Simooni omwana wa Yokaana, ontaka?"

Iye n'amwiramumu ati, "Niikyo ekyo Musengwa, omaite oti nkutaka." OYesu n'amukoba ati, "Olisyenge entaama gyange."

17 Tete n'amubuulya omulundi ogwokusatu ati, "Simooni omwana wa Yokaana, ontaka?"

Ekyo ni kimuluma olw'okubba oYesu yamubwirye omulundi ogwokusatu ati, "Ontaka?" Iye n'amwiramumu ati, "Musengwa, iwe mpaawo ekyotamaite. Omaite oti nkutaka."

OYesu n'amukoba ati, "Olisyenge entaama gyange."

18 Nkukobera amazima nti owewabbaire ng'oli munyeete, wazwalanga n'oyaba egyotaka. Neye atyanu owookulire, waliteekawo engalogyo, ni bakuzwalisya kaisi ni bakutwala egyotataka."

19 Ekyo oYesu yakitumwire, ng'alaga enfa oPeetero egiyalifaamu okugulumalya

oKibbumba. Era awo, n'akoba oPeetero ati, "Weegumye okubba musengereri wange."

<sup>20</sup> Awo oPeetero n'agaluka okulola e nyuma, n'abona omwegi oodi oYesu oguyatakanga, ng'abasengererya. Omwegi oyo nago, niye oodi eyeigikireku oku Yesu omu kifubba katono nga balya, kaisi n'amubuulya ati, "Musengwa, naani eyakulyamu olukwe?"

<sup>21</sup> Awo oPeetero oweyamuboine, n'abuulya oYesu ati, "Musengwa, onu iye yalibba atya?"

<sup>22</sup> OYesu n'amwiramumu ati, "Singa owentaka nti asigale mwomi paka owenaliira, ekyo kikukwataku? Iwe weegumye kubba musengereri wange."

<sup>23</sup> Olw'ekibono ekyo okalebule n'asaalaana omu boluganda ati omwegi oPeetero ogubabaire batumulaku nago, tiyalifa. Neye oYesu iye tiyakobere ati omwegi nago tiyalifa, wazira ekiyakobere kyabaire kiti, "Singa owentaka nti asigale mwomi paka owenaliira, ekyo kikukwataku?"

<sup>24</sup> Oyo nago niye omwegi akakasa ebintu ebyo, era niye eyabiwandiikire. Kale tumaite tuti ebiyawandiikire ebyo bituuce.

### *Ebimaliirirya*

<sup>25</sup> OYesu yakolere ebintu ebindi bingi. Era singa buli kimo bakiwandiikire, nseega nti waire kyalo kyonakyaona tikyandituukiremu ebitabo ebibandibaire bawandiikire.

**ENdagaano eMpyaka oMu Lugwere**  
**Gwere: Endagaano Empyaka Omu Lugwere (Bible)**

copyright © 2017 Wycliffe Bible Translators, Inc.

Language: Gwere

Contributor: Wycliffe Bible Translators, Inc.

All rights reserved.

2025-05-03

---

PDF generated using Haiola and XeLaTeX on 2 May 2025 from source files  
dated 3 May 2025

03698e2d-9c8d-5b1f-bc49-b0066e860180